

宋十五家詩選

宋十五家詩選

東海 陳 訐

陸 游

字務觀越州山陰人十二能詩文蔭補登仕郎  
年試禮部復置游前列檜顯黜之繇是爲所  
嫉檜死始赴寧德簿以薦除敕令所刪定官  
孝宗初遷樞密院編修官兼編類聖政檢討  
官以薦召見賜進士出身尋出通判建康府  
易隆興府免歸改判夔州王炎宣撫川陝辟  
爲幹辦公事范大成帥蜀爲參議官以文字  
交不拘禮法人譏其放自號放翁後累遷江  
西常平提舉與祠起知嚴州再召見遷禮部  
郎中兼實錄院檢討官同修三朝國史實錄  
尋兼秘書監陞寶章閣待制封渭南伯詩有  
劍南集

劉後村云近歲詩人雜博者堆隊仗空疎者  
窘材料出奇者費搜索縛律者少變化惟放  
翁記問足以貫通力量足以驅使才思足以  
發越氣魄足以陵暴南渡而下故當爲一大

宗

放翁一生精力盡於七律故全集所載最多  
最佳古詩稍有鬆處然至其精采發露自斑  
剝可愛讀放翁詩須深思其鍊字鍊句猛  
力鏖錘之妙方得真面目若以淺易求之不  
密去而萬里

寄酬曾學士學宛陵先生體比得書云所寓廣教僧  
舍有陸子泉每對之輒奉懷

庭中下午鵲門外傳遠書小印紅屈蟠兩端黃蠟塗開緘  
展矮紙滑細疑卵膚首言勞良苦後問逮妻孥中間勉以  
仕語意極勤渠字如老瘠竹墨淡行疎疎詩如古鼎篆可  
愛不可摹快讀醒人意垢癢逢爬梳細讀味益長炙轂出  
膏腴行吟坐卧看廢食至日晡想見落筆時萬象聽指呼

亦知題詩處綠井石髮麤公閒計有客煎茶置風爐倘公  
無客時濯纓亦足娛井名本季疵思人理豈無居然及賤  
子媿謝恩意殊幾時得從公舊學鋤荒蕪古文講聲形誤  
字辨魯魚時時酌井泉露芽奉瓢盂不知公許否因風報  
何如

新夏感事

百花過盡綠陰成漠漠爐香睡晚晴病起兼旬疎把酒山  
淡四月始聞鶯近傳下詔通言路已卜餘年見太平聖主  
不忘初政美小儒惟有涕縱橫

畱題雲門草堂

小住初爲旬月期二年畱滯未應非尋碑野寺雲生屢送

客溪橋雪蒲衣親滌硯池餘墨漬卧看盤面散烟霏他年  
遊宦應無此早買漁簑未老歸

晚泊慈姥磯

慈姥磯頭月纖纖照酒杯素秋風露重久客鬢毛催宿鳥  
驚還定飛螢闔夜開平生四方志老去轉悠哉

溪行

篷弱鳴春雨帆蒲掛暮烟買魚尋近市覓火就隣船愁卧  
醒還醉灘行却復前長年殊可念力盡逆風牽

自來福州詩酒殆廢北歸始稍稍復飲至永嘉拈蒼  
無日不醉詩亦屢作此事不可不記也

尊酒如江綠春愁抵草長但令開一日便擬醉千場柳弱

風禁絮花殘雨清香客遊還役役心賞竟茫茫

東陽道中

風歛烏帽送輕寒雨點春衫作碎斑小吏知人當著句先  
安筆硯對溪山

曾伯原屢勸居城中而僕方欲自梅山入雲門今日  
病酒偶得長句奉寄

借得山房似釣船兼旬散髮醉江天酒能作病真如此窮  
乃工詩却未然閒似白鷗雖自許健如黃犢已無緣秋高  
更欲移家去先葺雲門屋數椽

秋陰

陂澤秋容淡郊原曉氣清雨來鵲有語社近燕無情拄杖

扶牖痛漁舟照眼明苦吟緣病輟隨意或詩成

夜宿陽山磯將曉大雨北風甚勁俄頃行三百餘里  
遂抵雁隨浦

五更顛風吹急雨倒海翻江洗殘暑白浪如山潑入船家  
人驚怖篙師舞此行日日苦滯留我亦蘆葦厭鳴榔書生  
快意輕性命十丈蒲帆百夫舉星馳電騖三百里坡隴聯  
翩雜平楚船頭風浪聲愈厲助以長笛颺鼙鼓豈惟流漲  
震山嶽直恐瀕洞連后土起看艸木盡南靡水鳥號鳴集  
洲渚稽首龍公謝風伯區區未禱煩神許應知老去負壯  
心戲遣窮途出豪語

自詠示客

衰髮蕭蕭老郡丞  
洪州又看上元燈  
羞將枉直分尋尺  
寧走東西就斗升  
吏進飽諳紙尾客  
來苦勸摸床稜  
歸裝漸理君知否  
笑指廬山古澗藤

廬山僧近寄藤杖甚奇

### 上已臨川道中

二月六夜春水生  
陸子初有臨川行  
溪溪橋斷不得渡  
城近卧聞吹角聲  
三月三日天氣新  
臨川道中愁殺人  
纖纖女手桑葉綠  
漠漠客舍桐花春  
平生怕路如怕虎  
幽居不省遊城府  
鶴軀苦瘦坐長饑  
龜息無聲惟默數  
如今自憐還自笑  
歛版低心事年少  
儒冠未恨終自誤  
刀筆最驚非素料  
五更欹枕一悽然  
夢裏扁舟水接天  
紅渠綠芡梅山下  
白塢朱樓禹廟邊



過玉山辱芮國器檢詳留語甚勤因寄此詩兼呈韓  
无咎有司

遼東歸老白襦裙名字何堪遣世間便謂與公長契濶不  
知留語故慇懃詩章有便猶應寄祿米無多切莫分舊見檢詳  
俸甚薄故有此戲倘見右司煩說似每因風月愴離羣

遊山西村

莫笑農家臘酒渾豐年留客足鷄豚山重水複疑無路柳  
暗花明又一邨簫鼓追隨春社近衣冠簡樸古風存從今  
若許閒棄月拄杖無時夜叩門

上虞逆旅見舊題歲月感懷

舩艫爲家東復西今朝破曉下前溪青山缺處日初上孤

店開時鶯亂啼倦枕不成千里夢壞牆閒覓十年題漆園  
傲吏猶非達物我區區豈足齊

衰病

衰病不浪出閉門烟雨中羣花添絮暝詩火試爐紅

湖村采老

甚作火仕宦蠟窠夢功名馬耳風山翁但更事人看作神  
通

春日

久拋朝幘嬾重彈華髮蕭然二寸冠不恨淒涼侵晚境猶  
能語笑向春盤銀盃酒色家家綠簫笠烟波處處寬一片  
梅花無復在郊嫌新暖換餘寒

聞雨

慷慨心猶壯蹉跎鬢已秋百年殊鼎鼎萬事祇悠悠不悟  
魚千里終歸貉一丘夜闌聞急雨起坐涕交流

滄灘

百夫正謹助鳴榔舟中對面不得語須臾人散寂無譁惟  
聞百丈轉兩車嘔嘔啞啞車轉急舟人已在沙際立霧斂  
蘆村落照紅雨餘漁舍炊烟濕故鄉回首已千山上峽初  
經第一灘少年亦慕宦遊樂投老方知行路難

有感

雲崦重重不易尋庖厨性命走山林但令有月同幽夢更  
用何人識苦心流輩漸稀知死近鬢毛無色覺愁侵平生  
自許忘情者頗怪燈前感慨深

京郢

荊州十月早梅春徂歲真同下阪輪  
天地何心窮壯士江湖從古著羈臣  
淋漓痛飲長亭草慷慨悲歌白髮新  
欲弔章華無處問廢城霜露溼荆榛

江陵道中作

山川雜吳楚氣候接秋冬  
水落魚可拾霜清裘欲重鄉遙  
歸夢短酒薄客愁濃  
白帝何時到高吟酹卧龍

重陽

照江丹葉一林霜折得黃花更斷腸  
商畧此時須痛飲細腰宮畔過重陽

早寒

汚郭猶殘暑，荆巫已早寒。  
潦收灘正白，霜重葉初丹。  
節物元非惡，情懷自鮮歡。  
暮年更世事，惟有醉江干。

馬上

燈前薄飢陳鹽齏，帶睡強出行江隄。  
五更落月移樹影，十月清霜侵馬蹄。  
荒陂噦噦已度雁，小市喔喔初鳴鷄。  
可憐萬里覓歸夢，未到故山先自迷。

移船

沙際舟銜尾相依，作四隣。暮年多感慨，分路亦酸辛。  
折竹占行日，吹簫賽水神。無勞問亭驛，久客自知津。

晚泊松滋渡口

此行何處不艱難，寸寸強弓且旋彎。  
縣近歡欣初得菜，江

回徙倚忽逢山繫船日落松滋渡跋馬雲埋澗瀕關未滿  
百年均是客不須數日待東遷

小灘拍拍鷗鷺飛溪竹蕭蕭杜宇悲看鏡不堪衰病後繫  
船最好夕陽時生涯落魄惟耽酒客路蒼茫自詠詩莫問  
長安在何許亂山孤店是松滋

蝦蟆碚

不肯爬沙桂樹邊朶頤千古向巖前巴東峽裏最初峽天  
下泉中第四泉齧雪飲冰疑換骨掬珠弄玉可忘年清遊  
自笑何曾足疊鼓鼙鼙又解船

雪中卧病在告戲作

面裂愁出門指直但藏袖誰云三峽熱有此凜冽候殷勤

愧雪片飛舞爲我壽方驚四山積已見萬瓦覆豈惟寒到  
骨遂覺疾在腠地爐熾薪炭噤坐連昏晝梅花真強項不  
肯落春後俗人愛桃李苦道太疎瘦清芬終見賞此事非  
速售已矣吾何言高枕聽簷溜

### 山寺

籃輿送客過江邨小寺無人半掩門古佛負牆塵漠漠孤  
燈照殿雨昏昏喜投禪榻聊尋夢嬾爲啼猿更斷魂要識  
人間盛衰理岸沙君看去年痕

峽漲時水高數十丈至冬盡落

### 寒食

峽雲烘日欲成霞漲水生紋淺見沙又向蠻方作寒食強  
持卮酒對梨花身如巢燕年年客心羨遊僧處處家賴有

春風能領畧一生相伴遍天涯

晚晴書事呈同舍

魚復城邊夕照紅  
物華偏解惱衰翁  
已鴛有恨啼芳樹  
野水無情入故宮  
許國漸疎悲壯志  
讀書多忘愧新功  
因君共語增惆悵  
京洛交遊欲半空

試院春晚

病思蕭條掩綠樽  
閒坊寂歷鎖朱門  
故人別久難尋夢  
遠客愁多易斷魂  
漫漫晚花吹灤岸  
離離春艸上宮垣  
此生飄泊何時已  
家在山陰水際邨

雪晴

臘盡春生白帝城  
俸錢雖薄勝躬耕  
眼前但恨親朋少  
身



外元知得喪輕日映滿牕松竹影雪消竝舍烏烏聲老來  
莫道風清減憶向烟燕信馬行

假日書事

萬里西來爲一饑坐曹日日汗霑衣但嫌憂喪妨人樂不  
恨疎慵與世違雕檻迎陽花併發畫梁避雨燕雙歸放懷  
始得閒中趣下馬何人又叩扉

秋思

魚復城邊逢雁飛白頭羈客恨依依遠遊眼底故交少晚  
歲人間樂事稀雲重古關傳夜柝月斜淡巷搗秋衣官閒  
況是頻移疾藥鼎熒熒卧掩扉

初夏新晴

曲徑泥新晚照明小軒  
纔受一牀橫翩翩乳燕穿簾影蔽  
蔽新篁解籜聲藥物屏除知病減  
夢魂安穩覺心平淡居  
不恨無來客時有山禽自贊名

夔州重陽

夔州鼓角晚淒悲恰是幽牕睡起時  
但憶社醅投菊蕊敢  
希朝士賜萸枝山川信美吾廬遠  
天地無情客鬢衰佳月  
掩門君莫笑病來紗帽不禁吹

遣興

酒量愁翻減詩聲老轉低  
日高羹馬齒霜冷駕雞栖已判  
功名迂寧論薄領迷賴無權入手軟弱實如泥

醉中到白崖而歸

醉眼矍矍萬事空今年痛飲灑西東偶呼快馬迎新月却  
上輕輿御晚風行路八千常是客丈夫五十未稱翁亂山  
缺處如橫綫遙指孤城翠靄中

小市

小市門前沙作堤杏花雖落不霑泥客心尚壯身先老江  
水方東我獨西慙慙軒牕仍汎掃遠遊書劔亦提攜子規  
應笑飄零慣故傍茆簷盡意啼

馬上

殘年流轉似萍根馬上傷春易斷魂烘煥花無經日並漲  
淡水過去年痕迷行每問樵夫路投宿時敲竹寺門不信  
太平元有象牛羊點點散烟邨

鄰水延福寺早行

化蝶方酣枕聞雞又着鞭亂山徐吐日積水遠生烟流泊  
真衰矣登臨獨惘然桃花應笑客無酒到愁邊

酒偶盡市  
酤不可飲

果州驛

驛前官路埃纍纍歎息何時送我歸池館罵花春漸老  
牕扉燈火夜相依孤鸞怯舞愁窺鏡老馬貪行強受羈到處  
風塵常撲面豈惟京洛化人衣

柳林酒家小樓

桃花如燒酒如油緩轡郊原當出遊微倦放教成午夢宿  
醒畱得伴春愁遠途始悟乾坤大晚節偏驚歲月遒記取  
晴明果州路半天高柳小青樓

聞杜鵑戲作

半世羈遊厭路歧，憑鞍日日數歸期。  
勞君樹杪叮嚀語，似勸饑人食肉糜。

送劉戒之東歸

去國三年恨未平，東城況復送君行。  
難憑魂夢尋言笑，空向除書見姓名。  
殘日半竿斜谷路，西風萬里玉關情。  
蘭堂粉署朝回晚，肯憶麤官數寄聲。

送范西叔赴召

天涯流落過重陽，楓葉搖丹已著霜。  
衰病強陪蓮幕客，淒涼又送石渠郎。  
杜陵雁下悲徂歲，笠澤魚肥夢故鄉。  
便恐從今常隔濶，舊交新貴例相忘。

欲駕征夫勑小留，南山南畔更逢秋。  
數聲過雁催行色，一盞昏燈話別愁。  
自昔文章關治道，卽今臺閣要名流。  
白頭尚作書癡在，賸乞朱黃與校讐。

自笑

自笑謀生事事疎，年來雖與地俱無。  
平章春韭秋菰味，拆補天吳紫鳳圖。  
食肉定知無骨相，珥貂空自詎頭顱。  
惟餘數卷殘書在，破篋蕭然笑獠奴。

嘉川舖得檄遂行中夜次小柏

黃旗傳檄趣歸程，急服單裝破夜行。  
蕭蕭霜飛當十月，離斗轉欲三更。  
酒銷頓覺衣裘薄，驛近先看炬火迎。  
渭水函關元不遠，着鞭無日涕空橫。

汚陽夜行

夜發汚陽驛坡陀岡阜重月斜欹帽影霜重溼裘茸野岸  
鳴枯葉烟林度曉鐘梁州明日到一笑解衰容

南沮水道中

磴舍臨湍瀨疊船聚小潭山形寒漸瘦雪意算方酣久客  
情懷惡頻來道路諸家山空悵望無夢到江南

長木夜行抵金堆市

夜行長木邨重霧雜零雨溼螢粘野蔓寒犬吠雲塢道壞  
交細泉亭廢立遺堵時時過農家燈火照鳴杼嗟予獨何  
事無歲得安處卽今窮谷中性命寄豺虎三更投小市  
酒慰羈旅高詠東山詩悵望懷往古

赴成都泛舟自三泉至益昌謀以明年下三峽

詩酒清狂二十年又摩病眼看西川心如老驥常千里身  
似春蠶已再眠算雪鳥奴停醉帽秋風白帝放歸船飄零  
自是關天命錯被人呼作地仙

雪晴行益昌道中頗有春意

杜陵雁下歲將殘疋馬西遊雪擁關顚顚敢忘雙闕路淹  
遲偏看兩川山春回柳眼梅鬚裏愁在鞭絲帽影間安得  
黃金成大藥爲人千載駐顏顏

過武連縣北柳池安國院煮泉試日鑄顧渚茶院有  
二泉皆甘寒傳云唐僖宗幸蜀在道不豫至此飲泉  
而愈賜名報國靈泉云



滴瀝珠璣翠壁間  
遭時曾得奉龍顏  
欄傾甃缺無人管  
滿院松風晝掩關

行殿淒涼迹已陳  
至今父老記南巡  
一泓寒碧無今古  
付與閒人作主人

我是江南桑苧家  
汲泉閒品故園茶  
只應碧缶蒼鷹爪  
可壓紅囊白雪芽

日鑄貯以小瓶蠟紙丹印封之  
顧渚貯以紅藍縑囊皆有歲貢

成都歲暮始微寒  
小酌遣興

革帶頻移紗帽寬  
茶鑪欲熟篆香殘  
疎梅已報先春信  
小雨初成十月寒  
身似野僧猶有髮  
門如邨舍強名官  
鼠肝蟲臂元無擇  
遇酒猶能罄一歡

海棠

范希元園

誰道名花獨故宮

謂故蜀燕王宮

東城盛麗足爭雄橫陳錦帳開

千外盡吸紅雲酒醖中貪看不辭持夜燭倚狂直欲擅春風拾遺舊詠悲零落瘦損腰圍凝未工

老杜不應無海棠詩意其失傳爾

初到蜀州寄成都諸友

流落天涯鬢欲絲年來用短始能奇無才謫作長閒地有  
惠留爲劇飲資萬里不通京洛夢一春最負牡丹時  
報與諸公道卷畫亭邊第一詩

登荔枝樓

平羌江水接天流涼入簾櫳已似秋喚作主人元是客知  
非吾土強登樓閒憑曲檻常忘去欲下危梯更小留公事  
無多厨釀美此身不負負嘉州

薛能詩不負嘉州只負身

晚登望雲

一出修門又十年  
輩流多已珥金蟬  
衰如蠹葉秋先覺  
似鰥魚夜不眠  
輦路疎槐迎駕處  
苑城殘日泛湖天  
君恩未報身今老  
徒倚危樓一泫然

晚來烟雨暗江干  
烽火遙傳畫角殘  
看鏡功名空自許  
上樓懷抱若爲寬  
青楓搖落新秋令  
白髮淒涼舊史官  
飽兒少年輕宿士  
可憐隨處強追歡

立秋後十日風雨淒冷獨居有感

急雨鳴瓦溝  
尖風入牕罅  
紗籠耿青燈  
寂寂新秋夜  
誰言薄領中  
乃復有此暇  
稍繙書冊讀  
已念灰火跼  
那知是羈客  
恍若在家舍  
睡晚且熟眠  
洗沐官有假

明日晦日也

秋日懷東湖

菴書池邊小釣磯垂竿幾度到斜暉青萍葉動知魚過朱  
閣簾閒看燕歸歲晚官身空自閤途窮世事巧相違邊州  
客少巴歌陋誰與愁城畧解圍

夜思

蒼烟華鬢久低摧歎息何堪歲月催殘暑已隨團扇去新  
涼還倚短檠來月痕澹澹侵苔砌雲葉蕭蕭覆水臺簿領  
沈迷無日了試憑詩思洗氛埃

送客至江上

多事經旬不出城今朝送客此閒行郊原遠帶新晴色人  
語中含樂歲聲天際斂雲山盡出江流收漲水初平故園

社友應惆悵五歲無端棄耦耕

溪居

作吏難堪簿領迷溪居聊復學幽棲病來酒戶何妨小老去詩名不厭低零落野雲寒飭水霏微山雨晚成泥自憐甫里家風在小摘殘蔬遠廢畦

秋夜獨醉戲題

敝袍羸馬遍天涯恰似伶優著處家社甕嫩醅初泛蟻寒缸殘燼自成花幽牕照影烏巾折醉手題詩淡墨斜莫恨久爲峨下客江湖歸去得雄誇

梅花

老厭紛紛漸鮮歡愛花聊復客江干月中欲與人爭瘦雪

後偷憑笛訴寒野艇幽尋驚歲晚紗巾亂插醉更闌尤憐  
心事淒涼甚結子青青亦帶酸

月地雲階暗斷腸知心誰解賞孤芳相逢只怪影亦好歸  
去始驚身染香渡口耐寒窺淨綠橋邊凝望立昏黃與卿  
俱是江南客剝欲樽前說故鄉

曉坐

低枕孤衾夜氣存披衣起坐默忘言瓶花力盡無風墮爐  
火灰淡到曉溫空橐時時聞鼠齧小牕一一送鴉翻悠然  
忽記幽居日下榻先開水際門

十一月八日夜燈下對梅花獨酌累日勞甚頗自慰  
也

奔走人間無已時  
夜牕喜對出塵姿  
移燈看影憐渠瘦  
掩戶留香笑我癡  
冷豔照杯欺麴蘖  
孤標逼硯結冰澌  
本來難入繁華社  
莫向春風怨不知

雨中睡起

磔磔寒禽無定棲  
纖纖小雨欲成泥  
松鳴湯鼎茶初熟  
雪積爐灰火漸低  
一氣推移均野馬  
百年蒙覆等醯鷄  
青山黃葉蘭亭路  
却憶鄰翁共架犁

快晴

地潤天門斗柄回  
今朝紅日遍池臺  
新陽蘇醒春前柳  
輕煖醫治雪後梅  
瓦屋螺青披霧出  
錦江鴨綠抱山來  
衰翁也逐兒童喜  
旋撥文書近酒杯

離嘉州宿平羌

初挈囊衣宿水邨蕭然一掃舊巢痕本來信手忘工拙却  
爲無心少怨恩自笑遠遊諳馬上已營小築老雲根淡烟  
疎雨平羌路便恐從今入夢魂

遊修覺寺

上盡蒼崖百級梯詩囊香枕手親攜山從飛鳥行邊出天  
向平蕪盡處低花落忽驚春事晚樓高剩覺客魂迷興闌  
掃榻禪房卧清夢還應到剡溪

雨後集湖上

野水交流自滿畦芳池新漲恰平堤花藏密葉多時在鷺  
占高枝盡日啼繡袂寶帟催結束金樽翠杓共提携白頭



自喜能狂在笑襍蠻牋落醉題

慈雲院東閣小憩

橫閣院東偏  
飈然拂榻眠  
香濃烟穗直  
茶嫩乳花圓  
巖倚團團桂  
筒分細細泉  
憑誰爲題版  
勝作小壺天

桃源

木缺橋橫一徑微  
斷烟殘靄晚霏霏  
十年勑客明雙眼  
五月遊人換夾衣  
水翠峽束成寒練  
靜蒼崖濺落素鯨飛  
爾來自笑癡頑甚  
著處吟哦不記歸

白堦院

時小雨  
初霽

冷翠千竿玉  
浮嵐萬幅屏  
凭欄避微雨  
挈笠遇歸僧  
殘日明樓角  
屯雲擁堦層  
溪山屬閑客  
隨意倚枯藤

東湖新竹

種棘編籬謹護持，養成寒碧映淪漪。  
清風掠地秋先到，赤日行天午不知。  
解籜時聞聲簌簌，放梢初見影離離。  
官閒我欲頻來此，枕簟仍教到處隨。

病後暑雨書

髮毛蕭颯疾初平，雲物輪囷氣未清。  
水漲小亭無路到，雨多幽草上墻生。  
牕昏頓減讐書課，屋老時聞墮瓦聲。  
止酒亡聊還自笑，少年豪飲似長鯨。

寓驛舍

予三至成都皆館於是

聞坊古驛掩朱扉，又憇空堂綻客衣。  
九萬里中鯢自化，一千年外鶴仍歸。  
遶庭數竹饒新筍，解帶量松長舊圍。  
惟有

南唐書  
壁間詩句在暗塵殘墨兩依依

宴西樓

西樓遺蹟尚豪雄  
錦繡笙簫在半空  
萬里因循成久客  
一年容易又秋風  
燭光低映珠簾麗  
酒暈徐添玉頰紅  
歸路迎涼更堪愛  
摩訶池上月方中

月下歸驛舍

歲歲常爲錦水行  
驛前雙堦慣逢迎  
艸深閒院蟲相語  
人靜空廊月自明  
病起酒徒嘲小戶  
才衰詩律愧長城  
何時却泛耶溪路  
卧聽菱歌四面聲

醉書

似閒有俸錢似仕無簿書  
似長免事仕似屬非走趨  
病能

加餐飯老與酒不疎婆娑東湖上幽曠足自悞時時喚客  
醉小閣臨紅蕖釣魚斫銀絲擘荔見玉膚檀槽列四十遺  
聲傳故都豈惟豪兩川自足誇東吳但恨詩不進榛荒失  
耘鋤何當掃纖豔傑作追黃初

秋思

巢燕成歸秋景奇頗容老子醉哦詩山晴更覺雲含態風  
定閒看水弄姿痛飲何由從次道竝遊空復憶安期天涯  
又作經年客莫對青銅恨鬢絲

秋興

無處逢秋不黯然驛前斜日渡頭烟吟肩雅與寒驢稱歸  
夢頻爭社燕先百歲猶穿幾兩屐千詩不及一囊錢故應

身世如團扇已向人間耐棄捐

雨中作

方驚歲更端不覺秋已孟雖云暑毒埃無奈風雨橫荷空  
湖面濶葉脫樹枝勁百卉亦已衰非復昔華盛遊子老忘  
歸一榻臥衰病欲談無客來向壁弄塵柄

龍眠壽馬

國家一從失西陲年年買馬西南夷瘴鄉所產非權奇邊  
頭歲入幾番一作數皮崔嵬瘦骨帶火印離立欲不禁風吹

圉人太僕空列位龍媒汗血來何時李公太平官京師立  
仗慣見渥洼姿斷縑歲久墨色暗逸氣尚若不可羈賞奇  
好古自一癖感事憂國空餘悲嗚呼安得毛骨若此三千

足銜枚夜度桑乾磧

自江源過雙流不宿徑行之成都

斷笮飄飄挂渡頭臨江立馬喚漁舟  
少城已破繁華夢老境聊尋汗漫遊  
斜日驛門雙堠立早霜風葉一林秋  
詩材蒲路無人取準擬歸驂到處留

瑞草橋

柘葉颼颼雪意驕檐頭雙兔遇歸樵  
宿醒未解題詩嬾虛過風流瑞草橋

布金院

萬里西來了宿緣憑鞭敲帽過年年  
山寒院落開爐月霜重郊原斲芋天  
淺碧鱗鱗人度竹長空杳杳鳥衝烟  
夜投

蕭寺清無寐樓角三更月滿川

病江原縣東十里張氏亭子未明而起

寸廩驅人卒歲勞一官坐失布衣高劒南十月霜猶薄江  
上五更雞亂號孤枕擁衾尋短夢青燈照影著征袍客愁  
相續無時斷那得并州快剪刀

寓舍書懷

借得茅齋近竹橋羈懷病思兩無聊春從豆蔻梢頭老日  
向樗蒲齒上消叢竹曉兼風力橫高梧夜挾雨聲驕書生  
莫倚身常健未盡凌烟鬢已凋

書懷

萬里驅馳坐一僂自憐無計脫塵鞿身留幕府還家少眼

亂文書把酒稀客路更逢秋色晚故山空有夢魂歸芋蕒  
豆飯元堪飽錯用人言恨子威

牛飲市中小飲呈坐客

牛飲橋頭小市東店門繫馬一尊同已能自置功名外尚  
欲相期意氣中褐擁紫茸迎曉日酒翻紅浪醉春風從今  
共約無疎索竹外梅花欲惱公

午寢

眼澀朦朧不自支欠伸常恨到牀遲庭花著雨晴方見野  
客敲門去始知灰冷香烟無復在湯成茶椀徑須持頽然  
却自嫌疏放旋了生涯一首詩

對酒



扇邊生怕庾公塵索笑來遊錦水濱  
四野雲齊初釀雪一枝梅動已催春  
綠尊有味能消日白髮無情不貸人  
商畧此生何所恨太平時得自由身

花時遍遊諸家園

看花南陌復東阡曉露初乾日正妍  
走馬碧鷄坊裏去市人喚作海棠顛

爲愛名花抵死狂只愁風日損紅芳  
綠章夜奏通明殿乞借春陰護海棠

花陰掃地置清尊爛醉歸時夜已分  
欲睡未成欹倦枕輪囷帳底見紅雲

絲絲花萼弄春柔不似疎梅只慣愁  
常恐夜寒花索寞錦

茵銀燭按涼州

自合江亭涉江至趙州

政爲梅花憶兩京  
海棠又滿錦官城  
鴉藏高柳陰初密  
馬涉清江水未生  
風掠春衫驚小冷  
酒潮玉頰見微赭  
殘年飄泊無時了  
腸斷樓頭畫角聲

夜宴

酒浪搖春不受寒  
燭花垂燼忽堆盤  
山川路邈人將老  
絲管聲遒夜向闌  
四海交朋更聚散  
百年光景雜悲歡  
自憐病眼猶明在  
更把名花半醉看

是日得范希元家晚海棠數枝繁麗一城所無

錦亭

天公爲我齒頰計  
遣飲黃甘與丹荔  
又憐狂眼老更狂  
令

看廣陵芍藥蜀海棠周行萬里遂所樂天公於我元不薄  
貴人不出長安城寶帶華纓真汝縛樂哉從今石湖公大  
度不記聾丞聾夜宴新亭海棠底紅雲倒吸玻璃鍾琵琶  
絃繁腰鼓急盤鳳舞衫香霧溼春醪凸盞燭光搖素月中  
天花影立遊人如雲環玉帳詩未落紙先傳唱此邦句律  
方一新鳳閣舍人今有樣

雨

映空初作繭絲微掠地俄成箭鏃飛紙帳光遲饒曉夢銅  
鑪香潤覆春衣池魚餒餒隨溝出梁燕翩翩接翅歸惟有  
落花吹不去數枝紅溼自相依

自芳華樓過瑤林莊

春晚江邊草過腰雨餘樓下水平橋名花未落如相待佳  
客能來不費招欄角峭風羅袖薄柳陰斜日玉驄驕此生  
醉死元關命敢笑聞雞趁早朝

卜居

歷盡人間行路難老來要覓數年閒供家米少因添鶴買  
宅錢多爲見山池面紋生風細細花根土潤雨斑斑借春  
乞火依隣里剩釀邨醪約往還

三月一日府宴學射山

北出昇仙路少東據鞍自笑老從戎百年身世酣歌裏千  
古功名感慨中天遠僅分山髣髴霧收初見日曠曠橫空  
我欲江湖去誰借冷然禦寇風

歸耕

隨牒人間鬢欲疎歸耕且復補東隅  
旣歛地確新春米衣  
拆天吳舊繡團有圃免煩官送菜叩門翻喜吏徵租不愁  
問字無來客惟欠楊雄宅一區

過野人家有感

縱轡江臯送夕暉誰家井臼映荆扉  
隔籬犬吠窺人過滿  
箔蠶饑待葉歸吳人直謂桑曰葉世態十年看爛熟家山萬里夢  
依稀躬耕本是英雄事老死南陽未必非

閒中偶題

久矣雲衢斂羽翰退飛更覺一枝安  
七千里外新開客十  
五年前舊史官花底清歌春載酒江邊明月夜投竿凝頑

直爲多更事莫怪胃懷抵死寬

病起書懷

病骨支離紗帽寬孤臣萬里客江干位卑未敢忘憂國事  
定猶須待闔棺天地神靈扶廟社京華父老望和鑾出師  
一表通今古夜半挑燈更細看

酒酣看劍凜生風身是天涯一秃翁捫蝨劇談空自許聞  
雞浩歎與誰同玉關歲晚無來使沙苑春生有去鴻人壽  
定非金石永可令虛死蜀山中

齋居書事

傭養金丹換鬢鬚微霜正要稱清癯平生風露充蟬腹到  
處雲山寄鶴軀道室焚香勤守白虛牕點易靜研朱自知

世事難諧偶不待幽人夜見呼

明日開霽益涼復得長句

睡起東牕照眼明朝陽爛熳作新晴已聞雨斷空堦滴更  
覺風從細葛生蛺蝶飛來停酒榼石榴飄落糝棋枰四時  
好處閒方覺不枉今年住錦城

月下醉題

黃鵠飛鳴未免饑此身自笑欲何之閉門種菜英雄老彈  
鋏思魚富貴遲生擬入山隨李廣死當穿冢近要離一樽  
疆醉南樓月感慨長吟恐過悲

百歲

百歲紛紛易白頭一年鼎鼎又清秋壯心空似驥伏櫪病

骨敢懷狐首丘屠釣論交成酒隱山林高卧得天遊莫悲  
晚節功名誤卽死猶堪贈醉侯

和范待制月夜有感

榆枋正復異鵬飛等是垂頭受舄屨坐客笑談嘲遠志故  
人書札寄當歸醉思尊菜黏篙滑饒憶鱸魚墜釣肥誰遣  
貴人同此感夜來風月夢苔磯

和范待制秋興

策策桐飄已半空啼螿漸覺近房櫳一生不作牛衣泣萬  
事從渠馬耳風名姓已甘黃紙外光陰全付綠尊中門前  
剝啄誰相覓賀我今年號放翁

東門外遍歷諸園及僧院觀遊人之盛



馬上哦詩畫醉鞭東城南陌去翩翩微風蹙水魚鱗浪薄  
日烘雲卵色天隔屋鳩鳴閒院落爭門花簇小轎軒病來  
久已疎杯酌春物撩人又被禪

幽居

殊方飄泊向誰論小住僧廬亦所欣得飽罷揮求米帖愛  
眠新著毀茶文摘蔬簋小霑清露斲藥鉏輕帶溼雲從此  
生涯足幽事宜遊虛用半生勤

剡曲故廬歸未得慙從地主借茅茨桃花春水夢不到菰  
菜秋風心自知彊健猶穿幾兩屐榮華正似一鉤絲此心  
炯炯無人會烟雨蒼茫獨立時

浣溪女

一作浣  
花女

江頭女兒雙髻了常隨阿母供桑麻當戶夜織聲呖啞地  
爐豆豉煎土茶長成嫁與東西家柴門相對不上車青裙  
竹笥何所嗟插髻燦燦牽牛花城中妖姝臉如霞爭嫁官  
人慕高華青驪一出天之涯年年傷春抱琵琶

### 江樓

急雨洗殘瘴江邊閒倚樓日依平野沒水帶斷槎流檣紙  
荒村晚呼牛古巷秋腐儒憂國意此處又搔頭

### 野步至青羊宮偶懷前年嘗劇飲於此

錦官城外曳枯筇此地天教著放翁萬事元無工拙處一  
官已付有無中挈雲柏樹瘦蛟立繞郭江流清鏡空欲把  
酒杯終覺嬾緩歌曾醉落花風

自詠

華髮蕭蕭居士身江頭風雨折烏巾無人問字尤宜懶有  
吏徵租未是貧薄宦儻來難倚仗舊交漸少每酸辛敲門  
且復尋僧話要結他生物外因

晝卧

秋暑侵人氣力微燒香高枕掩齋扉弄姿野蔭晴猶歛作  
態江雲晚未歸身外極知皆夢事世間隨處有危機故山  
松菊今何似晚矣淵明悟昨非

早行至江原

喔喔鳴雞促起程翻翻飛鷺導孤征節旄盡落歸猶遠帶  
眼頻移瘦自驚小市蕭條黃葉滿斷橋零落綠苔生居人

猶復多愁思，何況天涯倦客情。

書寓舍壁

天與癡頑不解愁，未埋病骨且閒遊。山於拄杖橫時着路，  
到芒屨破處休。初擬燒丹住南嶽，却因學劍客西州。秋風  
巾葛添蕭爽，又作臨邛十日留。

西巖翠屏閣

把酒孤亭半日留，西巖獨擅鶴山秋。也知絕境終難賦，且  
喜閒身得縱遊。鶴起危巢時磔磔，鹿鳴溪澗莫呦呦。人生  
適意方爲樂，甲第朱門祇自囚。

秋晚登城北門

幅巾藜杖北城頭，卷地西風滿眼愁。一點烽傳散關信，兩

行雁帶杜陵秋山河興廢俱搔首身世安危入倚樓橫槊  
賦詩非復昔夢魂猶繞古梁州

募秋

時序中年速風霜客路長孤愁巴月白清夢楚山蒼燈暗  
秋銜壁鐘疎夜殷床端居有微祿不敢恨殊方

初冬夜宴

絲管紛紛燭滿堂臬虛擲罷夜飛觴帷屏風定歌雲暝香  
獸烟濃漏箭長泛菊已成前日夢撿梅又續去年狂醉歸  
自笑摧頽甚冷逼貂裘怯曉霜

病酒述懷

閒處天教著放翁艸廬高卧作橋東數莖白髮悲秋後一

醅青燈病酒中李廣射歸關月墮劉琨嘯罷塞雲空古人  
意氣憑君看不待功成固已雄

江樓醉中作

淋漓百榼宴江樓秉燭揮毫氣尚遒天上但聞星主酒人  
閒寧有地理憂生希李廣名飛將死慕劉伶贈醉侯戲語  
佳人頻一笑錦城已是六年留

退之詩云越女  
一笑三年留

謁漢昭烈惠陵及諸葛公祠宇

雨止風益豪雪作雲不動淒涼漢陵廟衰艸卧翁仲畫妓  
空笙竽土馬闕羈鞅壤沃黃犢耕柏密幽鳥呀尚想忠武  
公身任社稷重整整渭上營氣已無岐雍少須天意定破  
賊寧患衆興亡信有數星隕事可痛陵邊四五家茆竹居

接棟手輟紙上箔

斥民皆以造紙爲業

醅熟酒鳴甕雖嗟生理微亦

足追饑凍劉葛固雄傑閱世均一夢論高常近迂才大本  
難用九原不可作再拜臨風慟

醉中出西門偶書

古寺閒房閉寂寥幾年耽酒負公朝青山是處可埋骨白  
髮向人羞折腰末路自悲終老蜀少年常願從征遼醉來  
挾箭西郊去極目寒蕪雉兔驕

閒意

柴門雖設不曾開爲怕行人損綠苔  
妍日漸催春意動好風時捲市聲來  
學經妻問生疎字嘗酒兒斟欲灑盃  
安得小園寬半畝黃梅綠李一時栽

江亭冬望

霜落江清水見魚偶來徙倚艸亭孤雪天黯淡常如晚烟  
樹微茫直欲無下澤乘車終碌碌上方請劍漫區區擬將  
疎逸消豪氣尋罷酒徒尋獵徒

一笑

半醉微吟不怕寒江邊一笑覺天寬莫愁艇子急衝雨何  
遜梅花頻倚闌萬事任從皮外去百年聊作夢中觀放翁  
縱老狂猶在倒盡金壺燭未殘

浣花賞梅

老子人間自在身挿梅不惜損烏巾春回積雪層冰裏香  
動荒山野水濱帶月一枝低弄影背風千片遠隨人石家



樓上貪吹笛肯放朝朝玉樹新

夜宴賞海棠醉書

便便癡腹本來寬不是天涯強作歡  
燕子歸來新社雨海棠開後却春寒  
醉誇落紙詩千首歌費纏頭錦百端  
深院不聞傳夜漏忽驚蠟淚已堆盤

卽席

解鞅名園眼倍明殷勤翠袖勸飛觥  
海棠紅杏欲無色蛺蝶黃鸝俱有情  
去日不留春漸老歸舟已具客將行  
倦遊短鬢無多綠生怕尊前唱渭城

東歸有日書懷

萬里橋邊白版扉三年高卧謝塵機  
半牕竹影碁僧去滿

棹蘋風釣伴歸看鏡已添新雪鬢聽雞重拂舊朝衣故人  
零落今無幾華表空悲老令威

暮冬夜宴

官機錦茵金蹙鳳舞娃釵墮雙鬟重寶爐三尺香吐霧畫  
燭如椽風不動主人愛客情無已箏聲未斷歌聲起亦知  
百歲等朝露便恐一歡成覆水爐紅酒綠春爲回坐上梅  
花連夜開堂前只尺異氣候冰合平池霜壓階

舟過玉津

玻璃江上送殘春疊鼓催颿過玉津蜀苑鶯花初破夢巴  
山風月又關身幅巾久已忘朝幘短劔惟思隱市塵莫倚  
諸公容此老西曹那許吐車茵

南定樓遇急雨

行遍梁州到益州今年又作度瀘遊江山重複爭供眼風  
雨縱橫亂入樓人語朱離逢峒獠棹歌欸乃下吳舟天涯  
住穩歸心嬾登覽茫然却欲愁

漁翁

江頭漁家結茆廬青山當門畫不如江烟淡淡雨疎疎老  
翁破浪行捕魚恨渠生來不讀書江山如此一句無我亦  
衰遲慙筆力共對江山三歎息

風順舟行甚疾戲書

昔者遠戍南山邊軍中無事酒如川呼盧喝雉連算夜擊  
兔伐狐窮歲年壯士春燕卧白骨老夫晨鏡悲華顛可憐

使氣尚未減打鼓順流千斛船

忠州醉歸舟中作

耿耿船牕燈火明東樓飲罷恰三更不堪酒渴兼消渴起  
聽江聲雜雨聲垂首道塗悲驥老滿懷風露覺蟬清蘭亭  
禹廟山如畫安得飄然送此生

萬州放船過下巖小留

畫船四月滿旗風飲散匆匆鵲首東醉裏偏憐江水綠意  
中已想荔枝紅斷碑零落莓苔遍幽澗淙潺畧彳通一疋  
寧無好東絹憑誰畫此碧玲瓏

舟出下半關

大舸凌驚濤飛度青玉峽虛壁雲濛濛陰洞風颯颯拂天

松蓋偃入水山脚插炎曦忽摧破亭午手忘筴懸知今夜  
喜月白宿沙夾曠哉七澤遊盟鷗不須歌

峽州甘泉寺

江上甘泉寺登臨擅一州山亭喜無恙老子得重遊灘急  
常疑雨林深欲借秋歸途更清絕倚杖喚漁舟

峽州東山

十年不踏東山路今日重爲放浪行老矣判無黃鵠舉歸  
哉惟有白鷗盟新秧刺水農家樂修竹環溪客眼明已駕  
巾車仍小駐綠蘿亭下聽鶯聲

江上觀月

暗浪衝舟鞺鞳聲夷陵城下正三更十分傾酒禁風力一

點無雲。月明久坐，不知衣露溼。浩歌時有水禽驚。詩成  
莫駕長鯨去。自是虛皇白玉京。

初發夷陵

雷動江邊鼓吹雄。百灘過盡失途窮。山平水遠蒼茫外地  
闢。天開指顧中。俊鶻橫飛遙掠岸。大魚騰出欲凌空。今朝  
喜處君知否。三丈黃旗舞便風。

初到荊州

萬里泛仙槎。歸來鬢未華。蕭蕭沙市雨。淡淡渚宮花。斷岸  
添新漲。高城咽晚笳。船牕一樽酒。半醉落烏紗。

醉歸

持酒江頭到夕霏。愁城頓覺解重圍。澄波宜月移船看醉

面便風走馬歸末路已驚添白髮故人頻報上黃扉  
隨官簿真成嬾乞我吳松舊釣磯

泊公安縣

秦關蜀道何遼哉公安渡頭今始回  
無窮江水與天接不斷海風吹月來  
船牕簾捲螢火開沙渚露下蘋花開  
少年許國忽衰老心折柁樓長

一作笛哀

舟行蘄黃間雨霽得便風有感

天青雲白十分晴帆飽舟輕盡日行  
江底魚龍貪晝睡淮南艸木借秋聲  
好山縹緲何由住羣髮蕭條只自驚  
莫怪時人笑疎嬾宦情元不似詩情

舟過小孤有感

小孤山畔峭帆風又見烟鬟縹緲中  
萬里客經三峽路千篇詩費十年功  
未嘗蒲箸蒲芽白先看堆盤鱸縷紅  
商略人生爲何事一簑從此入空濛

泛小舟姑熟溪口

姑蘇綠可染小艇追晚涼棹進破樹影  
波動搖星芒荻溪漁火明風遠水艸香  
尚想錦袍公醉眼隘八荒坡陀青山冢  
斷碣卧道旁悵望不可逢棄雲遊帝鄉

溪東卽青山太白墓

將至京口

卧聽金山古寺鐘三巴昨夢已成空  
船頭坎坎回帆鼓旗尾舒舒下水風  
城角危樓晴靄碧林間雙塔夕陽紅  
銅甍愁汲中濡水不見茶山九十翁

頃在京口嘗取中濡水寄曾文清公



汭谿

射的峯前禹廟東  
短篷三扇卧衰翁  
閒攜清聖濁賢酒  
重試朝南暮北風  
水落痕留紅蓼節  
雨來聲滿綠蒲叢  
衝烟莫作匆匆去  
擬看溪丁下釣筒

歸雲門

萬里歸來值歲豐  
解裝鄉墅樂無窮  
餽炊飽雨湖菱紫  
裊絡迎霜野柿紅  
壞壁塵埃尋醉墨  
孤燈餅餌對鄰翁  
微官行矣闌山去  
又寄千巖夢想中

月下自三橋泛湖歸三山

素壁初升禹廟東  
天風爲我送孤篷  
山橫玉海蒼茫外  
人在冰壺縹緲中  
茅舍燈青聞吠犬  
蘋汀烟淡見驚鴻  
白頭

尚耐清寒在安得終年伴釣翁

懷成都十韻

放翁五十猶豪縱錦城一覺繁華夢竹葉春醪碧玉壺桃  
花駿馬青絲鞵鬪鷄南市各分朋射雉西郊常命中壯士  
臂立綠條鷹佳人袍畫金泥鳳椽燭那知夜漏殘銀貂不  
管晨霜重一梢紅破海棠回數葢香新早梅動酒徒詩社  
朝算忙日月匆匆迭賓送浮世堪驚老已成虛名自笑今  
何用歸來山舍萬事空卧聽糟牀酒鳴龕北牕風雨耿青  
燈舊遊欲說無人共

湖村秋晚

劒閣秦山不計年却尋剡曲故依然盡收事業漁舟裏全

付光陰酒榼邊平野曉聞孤唳鶴澄湖秋浸四垂天九關  
虎豹君休問已向人間得地仙

偷閑

老向人間未拂衣偷閑聊喜息塵機丹楓斷岸秋來早淡  
日孤村客到稀偶憶雪溪攜鶴去却從雲肆買蓑歸酒徒  
莫笑生涯別久矣淵明悟昨非

題齋壁

葺得湖邊屋數椽茅齋低小竹牕妍爐烟寂歷歸村路山  
色蒼寒釀雪天性懶杯盤常偶爾地偏雞犬亦翛然早知  
栗里多幽事虛走人間四十年

夢至成都悵然有作

春風小陌錦城西翠箔珠簾客意迷下盡牙籌閒縱博刻  
殘畫燭戲分題紫氍毹暖帳中醉紅叱撥驕花外嘶孤夢  
淒涼身萬里令人憎殺五更雞

自雲門之陶山肩輿者失道行亂山中有茅舍小塘  
極幽邃求見主人不可意其隱者也

陂池幽處有茅堂井白蕭條艸樹荒小鴨怯波時聚散病  
蔬傷蠹半青黃童兒衝雨收魚網婢子聞鐘上佛香我亦  
算年思屏迹數椽何計得連牆

冬夜聽雨戲作

少年交友盡豪英妙理時時得細評老去同參惟夜雨焚  
香卧聽畫簷聲

遶簷點滴如琴筑支枕幽齋聽始奇憶在錦城歌吹海  
七  
年  
夜  
雨  
不  
曾  
知

欲行雨未止

幽幔依燈影空堦送雨聲  
楚歸仍客路投老倍鄉情  
眼澀書難讀心搖夢易驚  
病多常怕醉酒盡却思傾

大雨中離三山宿天章寺

苦雨催寒不肯晴晚來餘勢更縱橫  
雲如山壤長空黑風似潮回萬木傾  
要借關河供遠眼不辭泥淖困初程  
解衣一笑僧牕下幾兩青鞋了此生

雙橋道中寒甚

裂面霜風快似鎌重重裘襖晚仍添  
梅當官道香撩客山

通籃輿翠入簾。男子坐爲衣食役。年光常向道塗淹。古來  
共說還家樂。豈獨全軀喪楚鉗。

宿魚梁驛五鼓起行有感

憶從南鄭客成都。身健官閒一事無。分騎霜天伐狐兔。張  
燈雪夜擲梟盧。百憂忽墮新衰境。一笑難尋舊酒徒。投宿  
魚梁溪遶屋。五更聽雨擁篝爐。

少時談舌坐生風。管葛奇才自許同。閉戶著書千古計。變  
名學劍十年功。酒醒頓覺狂堪笑。睡起方知夢本空。他日  
故人能憶我。葛仙磯畔覓漁翁。

若耶溪有葛仙公釣磯

建安雪

建谿官茶天下絕。香味欲全須小雪。雪飛一片茶不憂。何

况蔽空如舞鷗銀瓶銅碾春風裏不枉年來行萬里從渠  
荔子腴玉膚自古難兼熊掌魚

園中雜書

蕭蕭慈竹鳥呼風宛似山光小閣東刻欲杖藜尋昨夢更

添紅綻綠陰中

山光閣在  
潭毒閣下

比牕看鏡意凄然夢斷梁州已七年獵獵綵旗春日晚不

堪花外見鞦韆

山南鞦韆最盛  
巷陌處處有之

筍生密密復疎疎來看偏宜曉雨餘乞與人間作圖畫幅

巾短褐小籃輿

殘花委地筍掀泥香枕詩囊到處攜幽夢欲成誰喚覺半

牕斜日鷓鴣啼

烹茶

麴生可論交正自良中聖年來衰可笑茶亦能作病墮嘔  
廢晨餐支離失宵暝是身如芭蕉寧可與物競兔甌試玉  
塵香色兩超勝把玩一欣然爲汝烹茶竟

思故山

千金不須買畫圖聽我長歌歌鏡湖湖山奇麗說不盡且  
復爲子陳吾廬柳姑廟前魚作市道士莊畔菱爲租一彎  
畫橋出林薄兩岸紅蓼連菰蒲陂南陂北鵝陣黑舍西舍  
東楓葉赤正當九月十月時放翁艇子無時出船頭一束  
書船後一壺酒新釣紫鱖魚旋洗白蓮藕從渠貴人食萬  
錢放翁癡腹常便便算歸稚子迎我笑遙指一抹西邨烟



夏日

微風過中庭庭樹颯有聲穿簾徐入座中屢有餘清  
展畫發古香弄筆娛晝寂是中亦何好使我喜忘食

客思

兩鬢星星久倦遊  
要涼况復寓南州  
未甘蟋蟀專清夜已  
嘆梧桐報素秋  
綺語安能敵生死  
熱官正欲快恩讐  
空堂飽作東歸夢  
夢泊嚴灘月滿舟  
舟行還山陰道出七里灘

遊南塢院

小破文書夢閒成  
杖履遊澗幽  
泉激激院靜竹修修  
病骨涼如洗  
歸心浩莫收  
舫輕不載石一葉  
亂波鷗

夜坐偶書

衰髮蕭疎雪滿簪  
算年光景易駸駸  
已甘身作溝中斷  
不願人知爨下音  
病鶴推頰分薄俸  
悲蛩斷續和微吟  
向來誤有功名念  
欲挽天河洗此心

月夜

小醉初醒月滿牀  
玉壺銀闕不勝涼  
天風忽送荷香過  
一葉飄然憶故鄉

橋南納涼

曳杖來追柳外涼  
畫橋南畔倚胡牀  
月明船笛參差起  
風定池蓮自在香  
半落星河知夜久  
無窮艸樹覺城荒  
碧筒莫惜頰然醉  
人事還隨日出忙

芒屨

芒屨一雙青筇枝九節輕登山猶健在投檄太遲生蒲意  
竹風冷入懷溪月明清秋故不遠回首憶蓴羹

夏夜不寐有賦

急雨初過天宇溼大星磊落纔數十饑鶻掠簷飛磔磔冷  
螢墮水光熠熠丈夫無成忽老大箭羽凋零劒鋒濯徘徊  
欲睡復起行三更猶凭闌干立

初秋書懷

二十年前已二毛卽今何恨鬢蕭騷孤燈自伴詩情苦俗  
子從嫌醉眼高烟外暮鐘來遠寺雨餘秋漲集空壕思歸  
更向文書嬾此手惟堪把蟹螯

晝卧聞碾茶

小醉初消日未晡  
幽牕催破紫雲腴  
玉川七盃何須爾  
銅碾聲中睡已無

北牕哦詩因賦

二十年來賦遠遊  
一牕又復寄南州  
雙鵝戲雨陂塘曉  
亂葉飄風院落秋  
顏鬢蹉跎愁覽鏡  
江山重複怯登樓  
平生事業詩千首  
殘稿從教處處留

崇安縣驛

驛外清江十里秋  
雁聲初到荻花洲  
征車已駕晨牕白  
殘燭依然伴客愁

步過縣南長橋遊  
南山普寧院山高  
處有塏院及小亭  
縹緲可愛恨不能到

偶扶藤杖過南津野寺長橋發興新暫就清溪照鬚鬢不  
妨翠霧溼衣巾山縈細棧疑無路樹落崩崖欲壓人朝暮  
有程常猝猝何因攜酒上嶙峋

卧輿

白首躬耕已有期鳳城歸路却遲遲卧輿擁被聽秋雨占  
盡人間好睡時

玉山堂南樓晚望

小樓在何許正在南溪上空濛過釣船斷續聞漁唱征途  
苦偏仄舒嘯喜清曠安得此溪水爲我變春醲

雨夜

小雨初涼夜殘燈欲暗時病多愁近酒心弱怯題詩舊友

殊方少歸耕晚歲宜回頭語孤影此意有君知

寓館晚興

隨牒人間不自憐衢州孤驛更蕭然百年細數半行路萬  
事不如長醉眠短髮經秋真種種腹寬耐事只便便晚牕  
商畧惟當飲安得黃花到眼邊

今年九月將盡竟未見菊

弋陽縣驛

大雨山中採藥回丫頭巖畔覓詩來喚船野渡逢迎雪攜  
酒溪頭領畧梅久客愁心端欲折何時笑口得頻開殷勤  
記着今朝事破驛空廊葉作堆

弋陽道中遇雪

我行江郊莽猶進大雪塞空迷遠近壯哉組練從天來人

間有此堂堂陣少年頗愛軍中樂跌宕不耐微官縛憑鞍  
寓目一悵然思爲君王掃河洛夜聽簌簌紙牕鳴恰似鐵  
馬相磨聲起傾斗酒歌出塞彈壓胷中十萬兵

梅花

臨州道中見梅  
數樹憔悴特甚

我與梅花有舊盟卽今白髮未忘情不愁索笑無多子惟  
恨相思太瘦生身世何曾怨空谷風流正自合傾城層冰  
積雪行人少試倩羈鴻爲寄聲

舊在成都初春無事日訪照覺保福正法諸刹甚可  
樂也追憶慨然因賦長句

憶在西川集寶坊幅巾蕭散日初長伊蒲塞饌分香積優  
鉢羅花散道場客路逢春增感慨舊遊回首已微涼新晴

強作尋幽計有底文書作許忙

正月十五日出郊至金石臺

漸老惜時節思遊那可忘雪晴天淺碧春動柳輕黃笑語  
寬衰疾登臨到夕陽未須催野渡聊欲據胡牀

晚晴

水聲瀟瀟赴回塘簾影疎疎遶四廊靜院數盃傾白墮幽  
牕一枕夢清湘澗侵書笥深防蠹啮徹衣箒剝得香解組  
徑歸應更樂偷閑猶足傲羲皇

春晚坐講忽夢泛舟飲酒樂甚既覺悵然有賦

夢泛扁舟逸興多畫橈搖蕩麴生波微風瑟瑟生蒲葦小  
雨霏霏溼芰荷舞落烏紗從歲去歌酣白紵奈情何年來



惟覺琴胥樂莫遣茶甌戰睡魔

遣興

老子癡頑憤轉蓬殘年嬾復問窮通  
赦書雖未除詩債盟府猶當策酒功  
桐嶺市回人踏月柘岡月落鳥呼風  
浮生觸處無真實豈獨南柯是夢中

南興縣起

夢中忘却在天涯一似當年錦里時  
狂倚寶箏歌白紵醉移銀燭寫烏絲  
酒來郫縣香初壓花送彭州露尚滋  
起坐南牕成絕嘆玉樓乾雀誤歸期

雨夜

兩鬢新霜換舊青客遊身世等浮萍  
少年樂事消除盡雨

夜焚香誦道經

得京書或怪久不通問

怪向江湖鍛羽翰雲霄那敢接鸚鵡  
鸞百年未必如炊久萬  
事真須作夢看白首據鞍慙俠氣  
清燈顧影嘆儒酸手遮  
西日成何味還我平生舊釣竿

水亭

日淡暑猶薄雨餘風更清  
條然水亭立試此葛衣輕  
晒粉  
憐孤蝶穿枝喜晚鷺誰知簿書裏也復得吾生

晝卧聞百舌

雨後郊原已遍犁陰陰簾幙燕分泥  
閒眠不作華胥計說

與春鳥自在啼

江南謂百舌爲春鳥

蛺蝶詞

蛺蝶子去復來草長齊腰花亂開蜜蜂辛苦爲人計林鶯  
百轉胡爲哉嗟爾蛺蝶獨得意飛來飛去無嫌猜追花逐  
絮闌干角人生安得如汝樂

書感

半世狂疎踐駭機算年持此欲安居會憑香火消前業已  
築茆茨訟昨非余村居築小軒以昨非名之薄俗慣看翻覆手憂心空  
復倒顛末烟篆雲笠家風在送老湖邊一釣磯

夏日

病退身初健時清吏更休渴蜂窺硯水慵燕息簾鈎碁局  
每坐隱屏山時卧遊真成愛長日未用憶新秋

初秋小疾効俳諧體

宿疾逢秋劇衰容逐日添專房一竹几列屋萬牙籤  
今年得書  
多頗遣悶凭清聖忘情付黑甜晚來風月好一笑捲疎簾

晚自白鹿泉上歸

坐穴藜牀愧未能酌泉聊喜曳枯藤詩從病後功殊少酒  
到愁邊量自增事業何由垂竹帛笑談空覺負交朋興闌  
却逐棲霞返寂寞西牕已上燈

夜酌

遙夜澆愁賴麴生燈前忽見卧長瓶比紅有句狂猶在染  
白無方老已成闌徑露螢粘溼艸塢簷風鐸亂疎更悲秋  
要是騷人事未必忘情勝有情

晚到東園

岸幘尋青士，憑軒待素娥。官身苦日短，荒圃得秋多。醉眼輕浮世，羈懷激浩歌。功名從蹭蹬，詩酒且婆娑。

馬上

客遊多感慨，老病少歡欣。去去穿村市，翻翻吹帽裙。天低落平野，雁遠入寒雲。漸覺江城近，秋笳馬上聞。

早行

江路迢迢馬首東，臨川一夢又成空。日高未泫晨霜白，風勁先消卯酒紅。山市人經饑饉後，孤生身老道途中。著身穩處君知否，射的峯前卧釣篷。

春晚風雨中作

箕踞藜牀岸幅巾何妨病酒住湖濱駕風浪作連三日掃  
地花空又一春樂事清宵當秉燭畏途平地有摧輪頽然  
耐辱君無怪元是人間澹蕩人

西村醉歸

俠氣崢嶸蓋九州一生常恥爲身謀酒寧剩欠尋常債劍  
不虛施細碎讎見孟東野詩岐路凋零白羽箭風霜破弊黑貂  
裘陽狂自是英雄事村市歸來醉跨牛

遣興

綠髮凋零白髮多山林未死且婆娑無端忤俗坐狂耳甚  
欲讀書如嬾何雨過亂葦堆野艇月明長笛和菱歌此中  
得意君須領莫愛車前印幾窠

遶簷新葉著啼鴛睡起東牕一榻橫愁袞袞來疑有約春  
堂堂去恨無情鵲飛局上新棋勢龍吼牀頭古劍聲莫歎  
柴荆無客到綠尊還對算山傾

月夜泛小舟湖中三更乃歸

落日愁思把釣釣南鄰借得采菱舟湖心月上明如畫樹  
杪風生冷逼秋壯歲功名漸汗馬暮年心事許沙鷗桐江  
一葉真奇策莫爲兒曹作滯留

病牕後偶書

秋色已蕭然曲肱清夜眠孤燈欺病後薄酒慰愁邊藥物  
從人乞文章畏客傳惟應一篷艇湖海送凋年

秋日聞蟬

斷角斜陽觸處愁長亭搔首晚悠悠世間最是蟬堪恨送盡行人更送秋

感秋

南山射虎漫豪雄投老還鄉一秃翁世味掃除和蠟盡生涯零落併錐空秋驚蠹葉凋殘綠病著衰顏失舊紅笠澤松陵家世事一竿惟是待西風

舟中作

斷岸飲觥觥清波跳噉噉紅橋未斜日白塢已昏鐘詩律與年邁客愁如酒濃宋公題壁處橫靄抱孤峰稱心寺有宋考功詩而予所未到望之慨然

霜天晚興



薄霜閉巷不勝清小立湖邊夕照明紅穎帶芒收晚稻綠  
苞和葉摘新橙閑評琴價留僧話靜聽松聲領鶴行壯志  
消磨渾欲盡西風莫動玉關情

中夜起出門月露浩然歸坐燈下有賦

月白萬瓦霜露重四山雨開門忽驚歎秋色已如許去蜀  
如昨日坐閱四寒暑無才屏朝跡有罪宜野處平生萬里  
心收歛卧環堵朱顏逝不留白髮生幾縷人言尺蠖屈要  
有黃鵠舉功名非老事歲晚忍羈旅

幽居

松陵甫里舊家風晚節何妨號放翁衰極睡魔殊有力愁  
多酒聖欲無功一編蠹簡晴牕下數卷

一作掩

疎籬落木中

退士所圖惟一飽諸公好爲致年豐

書歎

多病文園苦滯留時時浩歎攬貂裘縱無夜雨何曾寐不  
爲秋風也自愁今歲頓驚絲鬢改此生難繼錦江遊欲談  
舊事無人共日落鴉歸又倚樓

杜門

寂寞山溪處嵒嶭歲暮時燒灰除菜蝗

讀如橫字去聲

送芋謝牛

醫寬水晨澆藥燈牕夜覆棋杜門君勿怪遲暮少新知

橫塘

橫塘南北埭西東拄杖飄然樂未窮農事漸興人滿野霜  
寒初重雁橫空參差樓閣高城上寂歷村墟細雨中新買

一簑苔樣綠此生端欲作漁翁

是日偶買  
簑衣甚妙

冬暖頗有春意追憶成都昔遊悵然有作

濯錦江邊卷畫樓金鞭曾護犢車遊紛紛萬事反乎覆落  
落一身淹此畱刻燭賦詩空入夢傾家釀酒不供愁揆春  
歌吹應如昨亦有朋儕記我不

### 醉書山亭壁

物外陽狂五百年扁舟又繫鏡湖邊飛昇未抵簪花樂遊  
宦何如聽雨眠綠蟻醴尊芳醞熟黑落紙艸書顛忽拈  
玉笛橫吹去說與旁人是地仙

### 蔬圃

山翁老學圃自笑一何愚磽瘠財三畝勤劬賴醇熟正方

畦畫局微潤土融酥剪闢荆榛盡鉏犂磊塊無過溝橫畧  
約聚斃起浮屠拾園中荒隙地成瓜稷餘功及芋區如絲  
細生菜似鳴爛蒸壺此事今真辦束歸不爲鱸

冬夜

歲晚風霜惡將如遙夜何殘燈挑更暗寒犬吠偏多支枕  
成孤詠懷人起浩歌梅花不解飲誰伴醉顏酡  
忽忽流年限悠悠獨夜情向人燈欲語遠舍露如傾夢每  
輕千里愁偏怯五更殷勤桑落酒好爲解餘醒

卯飲醉卧枕上有賦

天寒朝泥酒熟醉卧篷牕雨勢平吞野風聲倒卷江漁簑  
傲狐腋菜把美牛腔常笑潮陽守南征畏下瀧

雨晴步至山亭欲遂遊東邨不果

邨陋垣墻頽歲晚風雨橫泥塗絕還往餐粥養衰病藥囊  
雜書卷白髮滿清鏡一榻卧兼旬不踐牆下徑烏鵲忽報  
晴霜重節候正厭供凍硯愁頗動蠟屐興山楹快遠眺松  
吹愜幽聽地瘦藥苗稀葉脫木枝勁東邨未爲遠腳力不  
濟勝三嘆入荆扉跣趺學僧定

炭盡地爐危坐至夜分戲作

短景牕易黑長宵爐少紅直令貧到骨未害氣如虹志士  
元謀道儒生敢諱窮霜嚴雖噤噤但愧讀書功

夜寒遣興

道人頽然寄北牕愁魔百萬一笑降夜闌酒渴有奇夢吞

楚七澤吳三江孤邨蕭蕭雨解雪寒犬噤卧饑鼠齧擁衾  
危坐待天明白首忍窮心似鐵

立春後三日作

拂面氈氈巷柳黃穿簾細細野梅香春回江表常年早日  
向山中特地長千古事終輸釣艇一毫憂不到禪房綠尊  
掩罷惟須睡高枕看人舉世忙

風雨旬日春後始晴

風吹過雁作斜行雨洗殘梅只淡香南浦春回波漸綠東  
菴睡起日初長詩牋屬稟慚新思博齒爭豪悔昔狂莫向  
晴牕對明鏡朱顏減盡鬢蒼蒼

晨起南牕晴日可愛戲作

蕭散山林一幅巾天公乞與自由身  
茅簷不似宮簷暖日滿南牕也可人

夜飲示坐中

胡雁叫羣寒夜長  
崢嶸北斗天中央  
達人太觀眇萬物  
烈士壯心懷四方  
縱酒長鯨渴吞海  
艸書瘦盡飽經霜  
付君詩卷好收拾  
後五百年無此狂

攜一尊尋春湖上

酒裏真須勉策勳  
百年何啻是中分  
花梢已點猩猩血  
水面初生瑟瑟紋  
一世極知均腐骨  
萬鍾元是付浮雲  
浩歌不恨無人和  
但借驚飛白鷺羣

春雨復寒遣懷

去日堂堂挽不回  
新年又傍鬢邊來  
雨聲欲作海棠祟  
書卷只爲春睡媒  
邨舍瘦蔬供薄酒  
地爐微火伴殘灰  
浩然忽起金鞭興  
漾水嶠山安在哉

幽居

遶屋巉巉碧玉峰  
箇中天遣養疎慵  
捐書已歎空虛腹  
得酒還澆壘塊胸  
曲几坐看窺戶月  
短篷卧聽隔城鐘  
柴桑自有歸來意  
枉道人間不見容

遣興

平生與俗馬牛風  
落魄人間亦未窮  
綠綺奏中香縹碧  
烏絲書罷燭花紅  
夢中吳蜀山川近  
醉後周秦戰伐空  
投老飄飄君勿笑  
也勝魚鳥在池籠



累日無酒亦不食肉戲作此詩

小築精廬剡曲傍  
枵然蟬腹與龜腸  
酒錢覓處無司業  
齋日多來似太常  
雲碓旋舂菰米滑  
風爐親候藥苗香  
明年更入南山去  
要試囊中服玉方

秋興

樵風溪上弄扁舟  
濯錦江邊憶舊遊  
豪竹哀絲真昨夢  
爽砧繁杵久驚秋  
墜枝橘熟初堪剪  
浮瓮醅香恰受簪  
莫道身閒總無事  
孤燈夜夜寫清愁

丈亭遇老人長眉及肩欲就之語忽已張帆吹笛而去

颯颯長眉綠覆肩  
欲推壽數意茫然  
若非楚國庚寅歲  
定

是堯時甲子年銅笛一聲驚宿鷺蒲帆數幅破晴烟遙知  
乘醉江湖去黃鶴樓頭又放顛

寓舍聞禽聲

日暖林梢鷓鴣鳴稻陂無處不青青老農睡足猶慵起支  
枕東牕盡意聽

湖邊曉行

蹇驢清曉掠湖堤緩轡迎涼帽影低露折渚蓮紅漸開雨  
催陂稻綠初分先秋葉已時時墮失旦雞猶續續啼不是  
老來忘睡美星南畝慣扶犁

對酒戲作

去日華輪不啻過凌烟勲業已蹉跎只言一寸丹心在無

奈千莖白髮何色比鵝雛京口酒聲如珠貫渭城歌身閒  
取醉真當勉莫學癡人夢蠓窠

徙倚

漁扉久不掩徙倚欲三更月正樹無影露濃荷有聲崢嶸  
歲將晚悄悄恨難平坐念中原沒男兒恐浪生

居山

涉世緣雖薄居山味自長穿雲雙屐溼洗藥一溪香有酒  
作臉纈無愁供鬢霜遼天渺歸鶴千載付茫茫

八月五日夜半起飲酒作艸書數紙

有漏神仙有髮僧碧巖欹枕對秋燈忽然起索三升酒颯  
颯蛟龍入剡藤

雨夜感懷

點滴空堦雨送涼  
青燈對影獨淒傷  
身如病木驚秋早  
心似鰥魚怯夜長  
鑄得黃金猶有術  
掃空白髮定無方  
蕭然禪榻君休笑  
一卷殘書伴枕傍

夜步庭下有感

夜遶中庭百匝行  
秋風傳漏忽三更  
星辰北拱疎還密  
河漢西流縱復橫  
驚鵲遶枝棲不穩  
冷螢穿竹遠猶明  
書生老抱平戎志  
有淚如江未敢傾

題書齋壁

隨分琴書適性情  
乍寒偏愛小牕明  
旋烹薏粟留僧話  
故種芭蕉待雨聲  
丹藥驗方非畏死  
文章排悶不求名  
是間

幽事君知否莫怪經秋不入城

秋雨排悶

今夏久無雨從秋却少晴空濛迷遠望瀟瑟送寒聲衣潤  
香偏著書蒸蠹欲生壞簷聞瓦墮漲水見堤平潯溢池魚  
出天低塞雁征螢飛明閣廡蛙鬧雜疎更藥釀時須焙舟  
閒任自橫未憂愁楚菊直恐敗吳杭夜永燈相守愁淡酒  
細傾浮雲會消散鼓笛賽西城

幽居書事

安命知天更不疑幽居最愛早寒時手中書墮初酣枕  
燈殘正劇碁鮮鯽每從溪女買香菰時就釣船炊山陰  
清絕君須記雪裏騎驢未辦詩

秋思

秋來情味更堪論身寄城南五畝園委轡看山無礙懶

梅聖

俞馬名

拾樵煎茗有青猿

王元之小童名

陂塘夜雨添新漲原野烟

蕪滅舊痕豈是平生少親友畧無人肯訪孤村

雨中小酌

晨起瞻雲日日西吾廬烟雨正淒迷愁看場上禾生耳且  
泥杯中酒到臍臆日幾時飛野馬甕天惟是舞醺雞前邨  
著屐猶通路自摘金橙擣鱸鱉

衰病有感

衰與病相乘山房冷欲冰在家元是客有髮亦如僧愁絕  
窮秋雨情親獨夜燈西隣有甘井聊得曲吾肱

倦枕先雞覺寒汀伴雁孤寂寥誰省錄衰病且枝梧鶴骨  
秋漸瘦龜腸夜自呼葢棺吾事定未敢泣窮途

野步書觸目

邨落初過雨園林殊未霜幽花雜紅碧野橘半青黃飛鷺  
橫秋浦啼鴉滿夕陽最憐山脚水撩亂入陂塘

秋夜獨過小橋觀月

湖上蕭蕭葉落頻小橋東畔岸綸巾乍圓素月升寒壁欲  
散微雲蹙細鱗有酒便應遣世事得閒隨處勝官身笑談  
但恨朋遊少安得幽人與卜隣

病愈

秋夕高齋病始輕物華凋落歲崢嶸蟹黃旋擘饒涎墮酒

淥初傾老眼明提筆詩情還跌宕  
倒牀藥裹尚縱橫閒愁  
却似憎人睡又起挑燈聽雨聲

新寒小醉睡起日已高戲作

倦眼矇矓睡易成  
華胥稅駕不多程  
衾重枕穩當霜夕  
蠲暖屏深擁宿醒  
栩栩蝶魂閒自適  
絲絲龜息靜無聲  
幽棲豈是忘微祿  
正怕條鈴擾五更

冬夜吟

昨夜凝霜皎如月  
碧瓦鱗鱗凍將裂  
今夜明月却如霜  
竹影橫牕更清絕  
造物有意娛詩人  
供與詩材次第新  
饑鴻病鶴自無寐  
山窮水絕誰爲隣  
西邨梅花消息動  
唧唧寒醅漸鳴瓮  
儘將醉帽插幽香  
此生莫作長安夢



移花遇小雨喜甚爲賦二十字

獨坐閒無事燒香賦小詩可憐清夜雨及此種花時

平水小憇

蓐食小菴中肩輿小市東霧收山淡碧雲漏日微紅酒旆  
村場近習船浦淑通平生喜行路小住莫怱怱

遊山歸偶賦

此生未寄一浮漚歸卧茅茨又四秋習氣未除惟痛飲幻  
軀偶健且閒遊買簑山縣雲藏市橫笛江城月滿樓與世  
沈浮最安樂莫思將相快恩讐

獨立

獨立柴荆外頽然一秃翁亂山吞落日野木倒寒空憂患

工催老飄零敢諱窮漁歌亦何恨悽斷蒲西風

城西晚眺

嫋嫋城笳咽熒熒漁火青霜凋兩岸柳水浸一天星靜看  
船歸浦遙聞雁落汀倚闌幽興極不敢恨飄零

蓬戶

蓬戶真堪設爵羅歲時野老自相過人情靜處看方見詩  
句窮來得最多枕上長歌時激烈樽前一笑且婆婆白頭  
萬事都經遍莫爲悲傷損太和

病中

風雨暗江天幽廳起復眠忍窮安晚境畱病壓災年客助  
修琴料僧分買藥錢餘生均逆旅未死且陶然

雨中泊舟蕭山縣驛

端居無策散閒愁，聊作人間汗漫遊。  
晚笛隨風來倦枕，春潮帶雨送孤舟。  
店家菰飯香初熟，市擔蓴絲滑欲流。  
自笑勞生成底事，黃塵陌上雪蒙頭。

曉枕

曉枕鶯聲帶夢聽，忽看淡日滿牕櫺。  
閒愁誰遣濃如酒，醉過殘春不解醒。

閒居書事

園林綠菜一番新，桃李吹成陌上塵。  
玩易焚香消永日，聽琴煮茗送殘春。  
隱居正欲求吾志，大患元因有此身。  
堪笑癡人營富貴，百年贏得冢前麟。

村居書觸目

雨霽郊原刈麥忙  
風清門巷麝絲香  
人僥笑語豐年樂  
吏省徵科化日長  
杖上花空開蝶翅  
林間甚美滑鷺吭  
飽知遊宦無多味  
莫恨爲農老故鄉

病中作

老鶴遼天興未窮  
此生光景自匆匆  
家爲逆旅相逢處  
身在巖柴欲發中  
澀眼尚于書有味  
孤愁殊覺酒無功  
揮戈艸檄今誰記  
歲晚江邊白髮翁

秋夜

老病龍鍾不入城  
濁醪麤糲飯餒餘  
生未霜邨舍秋先冷  
無月江邊夜自明  
出塞雖慙平賊手  
下帷聊喜讀書聲  
山童

睡熟青燈暗自撥殘爐候藥鎚

歲暮

小築幽棲與拙宜讀書寫字伴兒嬉已無嘆老嗟卑意却  
喜分冬守歲時羹臠芳鮮新弋雁木襦輕煖自纒絲農家  
歲暮與堪樂說向公卿未必知

晨興

倦枕厭寒夜起尋殘火溫喈喈衆雞動耿耿一燈昏野氣  
增霜力臆光淡月痕早朝非老事且復灌吾園

一室

九萬笑鵬搏幽居一室寬雨聲便早睡酒力壓新寒嬾覺  
閒多味寒知死有端此身吾自斷不必夢邯鄲

幽事

蕭然四壁野人家幽事還堪對客誇  
快日明牕閒試墨寒泉古鼎自烹茶  
桐凋無復吟風葉蘋老猶殘泣露花  
萬里封侯真已矣只將高枕伴生涯

冬夜與溥菴主說川食戲作

唐安薏米白如玉漢嘉枿脯美勝肉  
大巢初生蠶正浴小巢漸老麥未熟  
龍鶴作羹香出釜木魚淪菹子盈腹  
未論索麩與饌飯最愛紅糟并魚粥  
東來坐閱七寒暑未嘗舉箸忘吾蜀  
何時一飽與子同更煎玉茗浮甘菊

野飲

青山千載老英雄濁酒三盃失阨窮  
訪古頽垣荒塹裏覓

交屠狗賣漿中平堤漸放春蕪綠細浪遙翻夕照紅已把  
殘年付天地騎牛吹笛伴邨童

樊江觀梅

莫笑山翁老據鞍揆梅今夕到江干半灘流水浸殘月二  
夜清霜催曉寒倚醉更教重秉燭怕寒元是怯憑闌誰知  
攜客芳華日曾費纏頭錦百端

射的山觀梅

射的山前雨墊巾籬邊初見一枝新照溪盡洗驕春意倚  
竹真成絕代人餐玉元知非火食化衣應笑走京塵卽今  
畫史無名手試把清詩當寫真

別梅

竹籬數掩傍漁磯。萬點梅花掠地飛。正喜巡簷來索笑，已悲臨水送將歸。影橫月處愁空絕，子滿枝時事更非。自古情鍾在我輩，尊前莫怪淚沾衣。

乙巳早春

故故啼鶯傍曲廊。飛飛戲蝶度橫塘。病來對酒心雖怯，老去逢花眼尚狂。牀擁琴書供枕籍，簾通風月索平章。一丘一壑從來事，起就功名未苦忙。

小隱

小隱在江干。茆廬亦易安。庖廚供白小，籬落蔓黃團。蹭蹬馮唐老，飄零范叔寒。世情從迫隘，醉眼覺天寬。

睡起



風約飛花滿曲廊蕭然無客共焚香  
殘力重初投枕鼻鼾聲豪已撼牀  
栩栩夢遊心自適昏昏起坐日方長  
靜憑一几吾何恨笑殺穿簾燕子忙

病起

山村病起帽圍寬春盡江南尚薄寒  
志士淒涼閒處老名花零落雨中看  
斷香漠漠便支枕芳艸離離悔倚闌  
收拾吟牋停酒椀年來觸事動憂端

芒種後經旬無日不雨偶得長句

芒種初過雨及時紗厨睡起角巾欹  
凝雲不散常遮塢野水無聲自入池  
綠樹晚涼鳩語鬧畫梁晝寂燕歸遲  
閒身自喜渾無事水覆熏籠獨誦詩

獨酌有懷南鄭

憶從嶓冢涉南沮，笳鼓聲酣醉膽麤。  
投筆書生古來有，從軍樂事世間無。  
秋風逐虎花叱撥，夜雪射熊金僕姑。  
白首功名元未晚，笑人四十歎頭顱。

秋夕虹橋舟中偶賦

解纜初離小市門，放篙衝破一溪雲。  
露螢合散自成陣，水鳥飛鳴如覓羣。  
楓落荷疎秋漸老，河傾斗轉夜將分。  
書生老負功名志，醉裏長歌強一欣。

秋思

一徑苔侵四壁空，北牕支枕聽秋鐘。  
故人去後登樓怯，白髮多來覽鏡慵。  
狂憶射麋窮楚澤，閒思釣雪泛吳松。  
相如

病渴年來劇釀酒傾家良不供

初秋山中作

萬里秋風吹幅巾卽今真個是閒人  
堆盤菱熟燕脂角藉藻鱸新  
淡墨鱗鮓嶺寒驢尋雪徑  
娥江孤艇繫烟津飄然樂事真  
當勉遠付十年無此身

秋夜歌

書生白首無處著病卧空齋夜蕭索  
茶鐺聽聽候湯熟燈檠敲敲看燼落  
山童喚起已復倒顧影自笑如孤鶴  
人言富貴墮駭機一生窮愁正不惡  
架上故裘破見肘牀頭殘酒傾  
倒脚問君何以鑒霜風倏然卧聽山城角

初寒晏坐

微火如螢度篆盤明牕坐敗幾蒲團羣兒誰信老懷嬾萬  
事不經醒眼看道在簞瓢端自足心閒天地本來寬此生  
自斷君知否不辦歸裝也掛冠

讀書

遠遯江湖上端居風雨中紙新牕正白爐煖火通紅  
方重整聲形且細窮扶衰倘未死更破十年功

病中久廢遊覽悵然有感

裘馬清狂徧兩川十年身似地行仙歸來訪舊半爲鬼已  
矣此生休問天不恨盃觴無藉在但悲山水曠周旋垂虹  
風月休如昨安得青錢買釣船

委轡

委轡去悠悠山窮得渡頭白雲生碧嶽翠木擁朱樓野植  
淵明酒征塵季子裘自憐詩興在杜若蒲芳洲

舟中感懷

夢筆亭邊擁鼻吟壯圖踴躍老侵尋不眠數盡雞三唱自  
笑當年起舞心

西興泊舟

衰髮不勝白寸心殊未降避風留水市岸幘倚船牕日上  
金谿海潮來雪捲江登臨數奇觀未易敵吾邦

新春

濛濛烟雨暗江干新歲還勝故歲寒酒壓濁清鳴社甕菜  
分紅綠簇春盤良辰節物元如昨病客情懷自鮮歡却羨

邨翁機上女，隔離相喚祭蠶官。

偶讀山谷老境五十六翁之句，作六十二翁吟。

三百里湖水接天，六十二翁身刺船。飯足便休慵念祿，丹成不服怕登仙。胸中浩浩了無物，世上紛紛徒可憐。但有青錢沽白酒，猶堪醉倒落梅前。

臨安春雨初霽

世味年來薄似紗，誰令騎馬客京華。小樓一夜聽春雨，深巷明朝賣杏花。矮紙斜行閒作艸，晴牕細乳戲分茶。素衣莫起風塵嘆，猶及清明可到家。

飲張公父園戲題扇上

寒食清明數日中，西園春事又匆匆。梅花自避新桃李，不

爲高樓一笛風

自真珠園泛舟至孤山

呼船徑截鴨頭波岸憤閒登瑪瑙坡弦管未嫌鶯鷺起塵埃無奈汚花何宦情不到漁簑底詩興偏於野寺多明日一藤龍井去誰知伴我醉行歌

還家

富貴元須早致身白頭豈復市朝人數聲鶉鴝呼殘夢一架酴縠送晚春疊嶂出雲明客眼澄江漲雨濯京塵逢人枉道哦詩瘦下語今年尚未親

天津橋上醉騎驢一錦囊詩一束書作客况當多病後還家已過暮春初泥溪村巷人誰顧艸滿園畦手自鋤不爲

衰遲思屏迹此心元向利名疎

春遊至樊江戲示坐客

江頭蕭蕭春色暮  
柳陰遊魚飽飛絮  
莖羹箭筍美如玉  
點鼓絲蒨滑縈筍  
銀鞍烏帽尋春客  
朱戶青旗沽酒處  
浮生細看纔幾時  
一笑自應忘百慮  
綠杯到手不肯盡  
寶帶照地身何與  
酴縵爛熳我欲狂  
酩酊還家君勿遽

暮春

顚顚都門白髮新  
歸來一振客衣塵  
啼鴛妒夢頻催曉  
飛絮鍾情獨殿春  
湖上風光猶淡淡  
沱尊前懷抱頗清  
真詩成絕恨知心  
少自寫吳牋寄故  
人

偶得海錯侑酒戲作



判無神藥斷清冥放筋那憎海物腥滿貯醇醪漬黃甲密  
封小甕餉紅丁從來一飽忘南北此去千鍾任醉醒添雪  
更知甌茗椀山童敲臼隔牕聽

遣興

莫羨朝回帶萬釘吾儕要可艸堂靈風來弱柳搖官綠雲  
破奇峯湧帝青聽盡啼鶯春欲去驚回夢蝶醉初醒從教  
俗眼憎疎放行矣桐江酌客星

雨後

礎潤還成雨雲收旋作晴巖花分日發林筍逐番生筆硯  
行常具軒牕晚更明塵埃幸不到那得廢詩情

飲伯山家因畱宿

小醉悠然不作醒  
斷雲飛盡却成晴  
月生檐外見簾影  
颯下城頭聞角聲  
岸幘莎庭便髮冷  
酌泉桐井覺魂清  
難號忽報明星上  
夢破虛皇白玉京

夜泛蜻蜓浦

四顧水無際  
三更月未生  
偶成搖櫂去  
不減御風行  
烟浦漁歌斷  
蘆洲鬼火明  
還家人已睡  
小立叩柴扉

自詠

射的山前一老樵  
此生何敢辱旌招  
繆緣學道肱三折  
不遇知音尾半焦  
去蠹區區慙啄木  
附高燁燁鄙陵霄  
但令窮死心無愧  
也勝鳴珂事早朝

題齋壁

二十餘年此結茅園公谿父日論交風翻半浦亂荷背雨  
放一林新筍梢隔葉晚鶯啼谷口接花雛鳴聚塘均出門  
行罷還無事借得丹經手自抄

四顧茫茫水接天幽居真個似乘船月牕竹影連棲鵲露  
井桐聲帶斷蟬甘寢每憎茶作祟清狂直以酒爲仙形骸  
那得常羈束六十年來又二年

解艫爲家一老翁陽狂羞與俗人同夢回菱曲漁歌裏身  
寄蘋洲蓼浦中斷簡塵埃存治道高丘草棘閉英雄旗亭  
卽酒何勞醉聊豁平生芥蒂胸

稽山千載翠依然著我山前一釣船瓜蔓水平芳艸岸魚  
鱗雲襯夕陽天山從父老觀秧馬歸伴兒童放紙鳶看

此翁閒適處不應便謂世無仙

早自烏龍廟歸

殘漏聲中聽曳鈴翩翩吹帽出郊垌  
雨餘澗落雙虹白雲合山餘一髮青  
鐵馬蹴冰悲昨夢朱顏辭鏡感頽齡  
歸來獨對空齋冷烏迹蒼苔自滿庭

新秋

打牕落葉報秋期病叟頽然兩鬢絲  
縱酒已無年少夢讀書仍負夜涼時  
問因損氣嗟誰念學道剝心恐已遲  
買鶴清溪歸計足寄聲先遣故人知

登北榭

遶城山作翠濤傾底事文書日有程  
無涸我爲揮吏散獨

登樓去看雲生香浮鼻觀煎茶熟喜動眉間煉句成莫笑  
衰翁淡生活他年猶得配玄英

方干有于  
峯樹詩

小酌

簾外桐疎見露蟬一壺聊醉嫩寒天團圞磊落吳江蟹縮  
項輪囷漢水鱖

此兩物近  
頗登盤

投老宦遊真漫爾平生懷抱固

超然文書縛急何由耐會向長安市上眠

自詠

鈍似牕間十月蠅淡如世外一孤僧心勞撫字雖亡補筆  
判虛空却能厭見文書銜客袖但思蔬水曲吾肱何時  
却宿雲門寺靜聽霜鐘對佛燈

不寐

閏年九月已重裘說著功名卽自羞病骨不禁霜氣峭高  
風正送雁聲迢半杯濁酒如欺老一點青燈欲訴愁不寐  
裁詩真習氣輸他睡足向黃州

次韻王給事見寄

大手方司一世文癯儒何敢望餘塵誰知天上黃扉貴肯  
記江邊白髮新末路愈窮詩有祟舊書渾忘筆無神牀頭  
周易尊中酒猶賴渠儂不負人

夜坐

山城意象自蕭然况是高齋作雪天漸暗玉蟲寒有燈欲  
殘金鴨爇無烟衰容病後如添歲遙夜冬來抵過年安得  
龍綃三丈幅爲君試寫白雲篇

病起小飲

病起新霜滿鬢蓬，  
一笑與誰同酒如淥。  
盡春江水入，  
有洪荒太古風。  
野寺鐘來夕陽外，  
寒山空插亂雲中。  
一官正爾妨人樂，  
只合滄浪狎釣翁。

病中偶得名酒小醉作此篇是夕極寒

一壺花露拆黃滕，  
醉夢酣酣喚不醒。  
屏煖半銷香鴨火，  
廳寒初結研蟾冰。  
詩囊差澀悲才盡，  
藥果縱橫覺病增。  
早掛朝衣歸去是，  
貴人誰記接茵憑。

東齋偶書

華髮蕭蕭不滿簪，  
強扶衰病著朝衫。  
寒廳靜似阿蘭若，  
佳客少于優鉢曇。  
詩酒放懷窮亦樂，  
文移肆罵老難堪。  
棄官

若遂飄然計不死揚州死劍南

顧光詩云人生只合揚州死而余常有歸蜀之意

### 夜登千峯榭

夷甫諸人骨作塵至今黃屋尚東巡  
度兵大峴非無策收泣新亭要有人  
薄醪不澆胷壘塊壯圖空負膽輪囷  
危樓插斗山銜月徒倚長歌一愴神

### 倚欄

閒岸紗巾小倚欄吳中三月尚春寒  
蜂脾蜜滿花初過燕觜泥新雨未乾  
老厭簿書思屏迹病逢節物強追歡  
一樽又動流年感城上斜陽畫角殘

### 登千峯榭

飛觀危欄縹緲中聊將醉眼送歸鴻  
一生未售屠龍技萬



里猶思汗馬功王衍諸人寧足責姜維豎子自應窮他年  
弔古憑高處想見清伊照碧嵩

初夏燕堂睡起

歌鳳平生類楚狂山城遲算得淡藏洗春雨過清陰合掠  
水風生綠藻涼晨几硯凹涵墨色午牕盃面聚茶香功名  
到手渾閒事此興他年未易忘

照潺湲閣下池水

平生不鑷白霜雪滿鬢眉照水默自笑已迫溝壑期慨然  
念歸休不計妻子饑渠饑亦有命我節詎可移自我來桐  
江實無負惇嫠譏波如崩山孤迹則已危陸子定何人正  
恐君未知午枕夢剡曲秋風吹釣絲

秋郊有懷

漫漫蕎麥花如雲覆平野離離豆子莢數枝忽堪把頗憶  
故鄉時屏迹謝車馬水宿依蟹舍泥行沒牛膝作勢歸薄  
算濁酒傾老瓦縷飛絲鯽膾花簇瀨鯉鮓棄官雖未決世  
念亦已且浩歌續楚狂幽懷欣獨寫

秋山瘦益奇秋水淺可涉山城西風勁拂帽吹脫葉新霜  
拆栗罅宿雨飽豆莢枯柳無鳴蜩寒花有穿蝶郊行得幽  
曠頗覺耳目愜斷雲北山來欣然與之接挂冠易事爾看  
鏡嘆勲業永懷桑乾河夜渡擁馬鬣

久無暇近書卷慨然有作

少年喜讀書事業期不朽致君頗自許書卷常在手白頭

乞鍾釜坐使此心負朝衙有達午夕坐或過酉文符苦酬  
對迎餽厭奔走直憂先狗馬豈但凋蒲柳永懷簡編香更  
覺冠冕醜饑餐一簞飯悶酌一卮酒吟哦從所好貧賤亦  
何有余悔已莫追寄謝故山友

初寒在告有感

掃地焚香興未闌一年佳處是初寒銀毫地綠茶膏嫩玉  
斗絲紅墨瀋寬俗事不教來眼境閒愁那許上眉端數櫺  
窗得西牕日更取丹經展卷看

燕堂東偏一室頗淡暖盡日率困于吏牘比夜乃得  
讀書其間戲作

衮衮流年往匆匆短景過簾淡上燈早地窄貯香多書盡

還重讀詩成更自哦向令無此處將奈旅愁何

賦性無他好閒編喜欲迷  
簪簪傳夜漏喔喔待晨雞  
油滅玉蟲暗灰淡紅獸低  
悠然撫書歎無術濟黔黎

到嚴十五晦朔郡釀不佳  
求於都下旣不時至欲借  
書讀之而寓公多秘不肯  
出無以度日殊惘惘也

桐君故隱兩經秋  
小院孤燈夜夜愁  
名酒過於求趙壁異  
書渾似借荊州  
溪山勝處真難到  
風月佳時事不休  
安得連車載鄴釀  
金鞭重作浣花遊

歲晚盤尊索然戲書

經年薄宦客桐廬  
市邑蕭然一物無  
名酒不求惟飲涇  
長魚難覓且焚枯  
支離鶴骨寒添瘦  
宛轉龜腸夜自呼  
更與

兒曹同一笑燈前短褐拆天吳

丁未除夕前二日休取感懷

掛冠神武莫躊躇家具何妨載鹿車  
怨謫相乘真市虎技能已盡似黔  
驢黃金散後猶耽酒白髮生來更愛  
書新歲定尋林下約一觴一詠未成  
疎

潺湲閣小立

飽食何曾補縣官潺湲閣上倚欄干  
水紋靴皴風初緊花色鞋紅露未乾  
薄酒愁邊供醉醒故人夢裏話悲歡  
孤城正在山窮處過社今朝尚爾寒

春殘

老墮空山裏春殘白日長庸醫司性命俗子議文章  
燭映

一池墨風飄半篆香籀中有佳處袖手看人忙

休日畱園中至募乃歸

儘道官身屬太倉未妨寄傲向林塘綠波春漲羣魚樂清  
露晨流蔓艸香閒試名弓來射圃醉盤騎馬出毬場長城  
萬里知誰許看鏡空悲兩鬢霜

宿漁浦

東歸剡曲只三程旅泊還如萬里行燈影動搖風不定船  
聲鞦韆浪初生曳裾非復白頭事瞑目那求青史名歸去  
若爲消募境一蓑烟雨學春耕

泝小江飯舟中

老作孤舟客秋濤漲小江林昏見飛燐邨近有驚龐天濶

三更月篷低一尺。鰕魚餐雖艸艸聊喜到吾邦。

七月十日到故山削瓜瀹茗翛然自適

鏡湖清絕勝吳松。家占湖山第一峯。瓜冷霜刀開碧玉。茶香銅碾破蒼龍。壯心自笑老猶在。狂態極知人不容。擊壤窮閭歌帝力。未妨堯舜亦親逢。

飯罷忽隣父來過戲作

旋吹香稻鬻新菰。飯飽逍遙樂有餘。茶味森森畱齒頰。香烟郁郁著圖書。毛皮尚在寧知我。鱗甲深藏莫問渠。賴有鄰翁差耐久。雨畦頻喚共攜鉏。

贈竹十韻

放翁小築湖西偏。虛牕曲檻無炎天。人間乃有真富貴。遠

舍十萬碧玉椽連林娟娟  
法清露高枝裊裊搖蒼烟  
常憂俗客觸新粉屢戒園  
丁傷逸鞭涼生尊竿消午  
醉聲撼牕扉驚晝眠春殘  
斲土得美苗氣壓卿相食  
萬錢爾來作吏若墮穽每  
一夢到心悽然還家再見  
却惆悵塵土何地從臞仙  
囊中幸傳餐玉法欲屏萬  
事相周旋更當待月出東  
嶺坐石冷冷揮響泉

雜感

自洗銅壺試玉醅小軒風  
月爲徘徊此心未與年俱  
老猶解逢花眼暫開側帽  
垂鞭小陌東名花迎笑一  
枝紅啼鴛鴦斷尋春夢惻  
悵新霜點鬢蓬



閒中戲書

糲飯從來不願餘，還山喜遂此心初。  
挽河盡洗彈冠念，閉戶閒簪種架書。  
一榼不妨從客飲，數椽也復是吾廬。  
少游細看猶多事，安用人間下澤車。

新晴泛舟至近邨偶得雙鯪而歸

西風一夜老汀蘋，剡曲稽山發興新。  
青嶂會爲身後塚，扁舟聊作畫中人。  
園林搖落知寒早，父老逢迎覺意真。  
歸舍不妨成小醉，眼明細柳貫霜鱗。

歲晚感懷

利名爭奪兩皆非，生世寧殊露易稀。  
老冉冉來誰獨免，冢累累處會同歸。  
聽歌莫惜終三疊，縱獵何妨更一圍。  
醉卧

日高呼不醒笑人霜曉束朝衣

繫舟平水步

舟尾參差野岸橫展聲穿市得閒行雨昏茆店炊烟溼人  
語篷牕續火明枝上橙香初受摘擔頭菰脆正堪烹漁樵  
自是平生意不爲衰遲薄宦情

南省宿直

檐角參差散暮霞重門鎖斷市聲譁風經綠樹鴉棲穩月  
入空廊柱影斜藤紙靜臨新獲帖銅瓶寒浸欲開花誰知  
今夕幽牕夢又撈扁舟上若耶

春夕睡覺

破衫羸馬老黃塵人自衰遲歲自新積雨恐侵春甲子昏

燈癩守夜庚申花枝影轉欹殘月鼻鼾聲豪撼四鄰自笑  
功名猶有夢散關金鼓震函秦

喜楊廷秀秘監再入館

公去蓬山輕公歸蓬山重錦囊三千篇字字律呂中文章  
實公器當與天下共吾嘗評其美如龍馬受轡燕許亦有  
名此事恐未夢嗚呼大厦傾孰可任梁棟願公力起之于  
載傳正統時時醉黃封高詠追屈宋我如老蒼鴉寂寞愁  
獨弄杖履勤來遊雪霽梅欲動

卽事

墜壁編茅養病翁五更擁褐聽霜風老雞棲冷啼偏早宿  
火灰淡撥更紅知我向來惟斷簡會心終竟在孤篷東歸

已賣腰間劒魯叟從今不諱窮

野饋

經年倉粟厭陳陳天遣香秔饋野人黃耳輩生齋鉢富白頭  
韭出客盤新此生不復營三釜一飽何曾羨八珍尚媿  
古來高士在盃羹無糝甌塵生

醉中浩歌罷戲書

造物小兒如我何還家依舊一漁蓑穿雲逸響蘇門嘯卷  
地悲風易水歌老眼閱人真爛熟壯心得酒漸消磨傍觀  
虛作窮愁想檢點霜髯却未多

記夢

夢裏都忘兩鬢殘恍然白紵入長安  
礮教紙熟修溫卷僦

得騎驢候熟官紅葉滿街秋著句青樓燒燭夜追歡如今  
萬事消除盡老眼摩挲靜處看

野興

鬢邊莫笑久星星造物常鍾我輩情每帶餘醒蹋花影又  
和殘夢聽鶯聲軒牕風過書籤亂洲渚潮生釣艇橫韓子  
未除豪氣在文章都待不平鳴

或問予近況示以長句

天亦知予嬾是真算年乞與自由身幽尋東浦鷺迎權獨  
卧北牕鶯喚人野卉滿頭狂取醉艸廬容膝樂忘貧死時  
是處堪藏骨不用要離更作鄰

初夏郊行

小硯孤吟恐作愁長堤曳杖且閒遊破雲山湧千螺翠經  
雨波涵一鏡秋拒枚青紅邨步市闌干高下寺家樓去年  
此日君知否十丈京塵沒馬頭

夏日

赤日黃塵襪襪忙放翁湖上獨相羊竹梢露滴驚殘夢荷  
蓋風翻送早涼暑用酒逃猶有待熱憑靜勝更無方空齋  
一榻脩然卧閒看水簾起篆香

夜意

孤夢初回夜氣清世塵掃盡覺心平月沉洲渚漁歌遠人  
語比鄰續火明獨汲寒泉鳴細縷靜聽漏鼓下高城悠然  
坐待東方白却看軒牕淡日生

蝸廬

小葺蝸廬便著家  
槿籬莎徑任欹斜  
爲生草草僧行腳  
到處悠悠客泛槎  
孤蝶惜衣晴曝粉  
穉蜂貪蜜晚爭花  
有書嬾讀吾堪愧  
睡起何妨自磴茶

午睡起遇急雨

揩眼捫鬚破晝眠  
關邊小立獨悠然  
叢花雨打無飛蝶  
高柳風驚有墮蟬  
才畧本居元子下  
功名那計祖生先  
今朝會意君知否  
日送飛鴻揮五絃

秋夜自近邨歸

江頭浩歌天宇寬  
刺船歸來清夜闌  
女貞林黑月未上  
姑惡聲悲邨已寒  
不恨故交日零落  
木知浮生難控搏  
頭童

面槁今安在莫問傍人君自看

小院

小院回廊夕照明放翁夜坐一筇橫銅匳暖徹香初過鐵  
杵聲清藥欲成世事熟看無一可古人不作與誰評新涼  
社酒家家熟便用陽狂了此生

故山

功名莫苦怨天慳一櫂歸來到死閒傍水無家無好竹捲  
簾是處是青山滿藍箭茁瑤簪白壓擔稜梅鶴頂殷野興  
盡時尤可樂小江烟雨趁湖邊

鏡湖

落澗泉奔舞玉虹護丹松老卧蒼龍霜柑籬角寒初熟野  
碓雲邊夜自舂挈榼人沽邨市酒打包僧趁寺樓鐘幽尋



自是年來嬾枉道山靈不見容

雲門

冬晚山房書事

屏迹山邨病日增烏皮几穩得閒凭凍雲俯水封梅萼嫩  
日烘牕釋硯冰歲盡光陰饒袞袞身閒醉夢且騰騰蠻童  
采藥歸來晚客至從喚喚不磨

邨居日飲酒對梅花醉則擁紙衾熟睡甚自適也

江邨歲晚掩柴荆地僻久無車馬聲孤寂惟尋麴道士一  
寒仍賴褚先生醉頭珠滴愁先破帳底春回夢易成莫笑  
衰翁殺風景小瓶梅藥解卿卿

寓歎

心已忘斯世天猶活此翁嬾湯茶乳白軟火地爐紅課婢

耘蕪甲呼兒下釣筒生涯君勿笑聊足慰塗窮

山園

買得新園近釣磯旋營茆棟設柴扉山經宿雨修容出花  
倚和風作態飛世事只成驚老眼酒徒頻約典春衣狂吟  
爛醉君無笑十丈愁城要解圍

信步近邨

端聞何以永今朝拈得筇枝渡野橋三畝空園喧啄木十  
尋高樹絡凌霄長饑未必緣詩瘦多悶惟須賴酒澆興盡  
歸來又陳迹一林風葉暮蕭蕭

晚春感事

和風薄靄過清明減盡重裘覺體輕正午軒牕無樹影乍

晴阡陌有鶯聲釀成西蜀鵝雛酒

鵝黃廣漢酒名

煮就東坡玉糝

羹捫腹翛然出門去春郊何處不堪行

### 邨居初夏

煮酒閒時日正長山家隨分會年光  
梅青巧配吳鹽白筍美偏宜蜀豉香  
風暝緊催蠶上簇雨餘閒看稻移秧  
老夫見事真成晚浪走人間兩鬢霜

天遣爲農老故鄉山園三畝鏡湖傍  
嫩莎經雨如秧綠小蝶穿花似繭黃  
斗酒隻雞人笑樂十風五雨歲豐穰  
相逢但喜桑麻長欲話窮通已兩忘

### 小園獨立

艸香無處覓花嫩不禁飛澤國春歸晚  
柴門客過稀新泥

添燕戶細雨溼鴛衣倚杖臨階久衰翁氣力微

自笑

自笑胸中抵海寬  
韭薑麥飯日加餐  
住山緣熟塵機息  
養氣功深稿畱丹  
惡路慣曾經濫瀕  
浮生何啻夢邯鄲  
鏡湖五月秋蕭爽  
剡傍灘頭把釣竿

秋雨

冷雨蕭蕭澀不晴  
叢篁遮盡小牕明  
故衾獨展成酣寢  
新釀初嘗得細傾  
壁簡積陰添蠹字  
牀琴生潤咽絃聲  
此時懷抱真難遣  
一首清詩信筆成

秋思

殘暑偏能著此翁  
吹襟剝喜得西風  
露滋小徑蘭苔冷  
月

射高梁燕戶空衰病呻吟真一洗醉歌跌宕與誰同從今  
日日增幽興水際先丹數葉楓

雁陣橫空送早寒白頭病叟住江干風林脫葉山容瘦霜  
稻登場野色寬萬里關河驚契濶一尊鄰曲話悲歡書生  
餓死尋常事那得重彈掛壁冠

苦雨歎

九淵龍公出忘還无溝垂溜聲淙潺茫茫大澤北際海歟  
歟平湖南浸山吾廬四望路俱斷蛙黾爭雄亂昏旦漏淋  
腐席夜失眠溼竈生薪朝不爨今年十分喜有秋豈知青  
秧出禾頭老夫一飽復繆悠聽兒讀書寬百憂

道石

吾家舊藏奇石甚富今無復存  
者獨道石一尚置几案間戲作

秋風嫋嫋雨斑斑  
身隱幽牕筆硯閒  
小試壺公縮地術  
數峯閒對道州山

林慮靈壁俱尤物  
散落人間不復還  
投老東歸風味在  
春陵小岫伴身閒

誤因祿米棄尊鱸  
一路塵埃底事無  
布襪青鞵雖興盡  
此峯聊當卧遊圖

募秋書事

暮秋風雨卷茆茨  
砧杵聲中過雁悲  
楓葉欲丹先慘澹  
菊叢半倒不支持  
旗亭人熟容賒酒  
野寺僧閒得對碁  
莫怪苦尋林下事  
駭機滿地只心知

初寒

蚊蠅埽迹葉初飛  
刺喜幽牕讀我書  
牆角短檠真耐久  
手  
半團扇又成疎  
百年作夢行休去  
九月無衣亦晏如  
蜀恨  
故人消息斷寒江  
誰與倩雙魚

張季長自離吳門未得近書

### 獨夜

獨夜迢迢掩素屏  
病懷羈思共吟塢  
房櫳十月寒初重  
風雨三更酒半醒  
繁杵有聲時斷續  
殘缸無焰尚青熒  
恍然喚起西征夢  
身卧金牛古驛亭

### 散吏

拜賜明時散吏名  
頭銜字字敵冰清  
讀書有味聊忘老  
賦祿無多亦代耕  
笠澤尊鱸秋向晚  
緱山笙鶴月微明  
人間樂事今真得  
莫恨推頽白髮生

題剡溪瑩上人梅花小軸

孤舟清曉下溪灘，爲訪梅花不怕寒。  
忽有一枝橫竹外，醉中推起短篷看。

晚飯罷小立門外有作

此心何敢慕輕肥，尚愧無功飽蕨薇。  
浦面鳥衝殘靄去，柳陰人荷一鋤歸。  
病嗟短髮紛紛白，老覺初心種種非。  
百步空庭著明月，黃昏手自掩荆扉。

舟過季家山小泊

困馳濛濛渴煮茶，繫船來叩野人家。  
風翻翠浪千畦麥，水漾紅雲一塢花。  
健犢破荒耕犂确，幽禽除蠹啄槎牙。  
尋春非復衰翁事，且伴兒童一笑譁。



山家暮春

行飯獨相羊，扶藜過野塘。  
晴光生蝶粉，暝律變鶯吭。  
赴美羣兒競，蠶饑小婦忙。  
淡知遊宦惡，窮死勿離鄉。

山園

山園寂寂閉春風，箇裏天教著放翁。  
萬事已拋孤枕外，一尊常醉亂花中。  
閒隨戲蝶忘形久，細聽啼鶯得意同。  
月桂可憐常在眼，小叢時放一枝紅。

次韻范叅政書懷

芋栗多儲煮復煨，一塵那許到靈臺。  
虹穿道室爐丹熟，龍吼空山匣劍開。  
躡屨未成遊地肺，掩扉聊欲隱天台。  
桃花榮謝吾何預，一任劉郎去後栽。

沽埭西酒小酌

埭西小店酒新篘一醉今朝覺易謀從曠劫來俱有死出  
青天外始無愁功名未許妨高卧風月猶能賦遠遊造物  
向人元不薄卷簾萬頃鏡湖秋

戲詠閒適

鈔書字細眼猶明搗藥聲清疾漸平桐葉雨邊尋斷夢菊  
花香裏散餘醒人間榮辱知難到紙上興亡看亦輕惟恨  
暮年交舊少滿懷情話向誰傾

涉世心知百不能閉門嬾出病相仍簞瓢味美如烹鼎鄰  
曲人淳近結繩半顆鴉殘牆外杏一枝鵲裊澗邊藤蕭然  
埭盡彈冠興敢爲詩情望武陵

小軒

四面山如碧玉城小軒聊得愜幽情乍飛乳燕低無力自  
落來禽靜有聲麟筆殘功成水晶蛇圖餘思入碁枰閒中  
事業吾能了未恨林廬送此生

靜院

靜院房櫳雨送涼熏籠衣幘潤生香小屏風疊圖遙碧古  
錦囊書塌硬黃已占江湖寬處老絕知日月靜中長敲門  
無客妨人睡更覺餘年樂未央

雨晴

閒曳枯筇自在行曲廊小閣賞新晴幽禽葉底吟風久殘  
雨枝間照日明茶映盞毫新乳土琴橫薦石紉泉鳴亦知

老健終難恃且復蕭然得此生

六月四日微雨極涼

湖上清秋近齋中白日長雲來樹收影雨過土生香蓮小  
紅衣溼瓜甘碧玉涼晚來幽興極移榻近方塘

水亭晚眺

暑雨初晴浦面寬水亭景物卷簾看聯舟作陣圍魚隊屈  
竹成籬護芡盤四海諸公半丘壘百年幾夕倚闌干日沈  
未用忽忽去待挽銀河濯肺肝

夢遊散關渭水之間

平生望眼怯天涯客裏何堪度歲華但恨征輪無四角不  
愁歸路有三義驛聽燈闇傳秋柝關樹烟深宿暮鴉叱犢

老翁頭似雪，羨渠生死不離家。

夜半池上作

夜永空齋睡不成，起扶藤杖傍池行。  
露濃雙鵲移枝宿，風急孤螢墮艸明。  
斷續更籌傳古戍，縱橫河漢接高城。  
寒泉未漱神先爽，靜聽銅瓶汲井聲。

晨起坐南堂書觸目

林塘天與占溪幽，一把茆輕萬戶侯。  
漠漠斷雲開復合，纖纖微雨落還收。  
奇峯角立千螺曉，遠水平鋪疋練秋。  
詩料滿前吾老矣，筆端無力固宜休。

新晴

積雨已淒冷，新晴還少和。  
稼收平野濶，木落遠山多。  
土潤

朝畦菜機鳴夜擲梭時清年歲好吾敢嘆蹉跎

秋雨不止排感

放翁愁坐茆齋裏泥潦連邨不得行  
夜夜溼星占雨候時  
時老木送秋聲小詩旋錄兼行艸  
薄酒新芻任濁清  
身世正如萍在水畧無根柢也能生

九月一日夜讀詩藁有感走筆作歌

我昔學詩未有得殘餘未免從人乞  
力屏氣餒心自知妄  
取虛名有慙色四十從戎住南鄭  
酣宴軍中夜連日打毬  
築塲一千步閱馬列廐三萬疋  
華燈縱博聲滿樓寶釵艷  
舞光照席琵琶絃急冰雹亂羯鼓手勻風雨疾  
詩家三昧忽見前  
屈賈在眼元歷歷  
天機雲錦用在我  
剪裁妙處非

刀尺世間才傑固不乏秋毫未合天地隔放翁老死何足  
論廣陵散絕還堪惜

上書乞再任冲佑

虬枝六尺藤方屋九寸帽人間無處著山水歸寄傲耳中  
聞淵明自來髮未燥高標不可揖七十忽已到明牕置經  
龕奧室養丹灶雖云迫遲暮要足平昔好悠然萬念空快  
若河卷埽寄聲幔亭雲行拜散人號

禹跡寺南有沈氏小園四十年前嘗題小閤壁間偶  
復一到而園已易主刻小閤於石讀之悵然

楓葉初丹槲葉黃河陽愁鬢怯新霜林亭感舊空回首泉  
路憑誰說斷腸壞壁醉題塵漠漠斷雲幽夢事茫茫年來

妄念消除盡回向禪龕一炷香

小園

窄窄柴門短短籬山家隨分有園池客因問字來攜酒僧  
赴分題就賦詩晨露每看花滿拆夕陽頻見樹陰移此二事非  
閒寂不知也拂衣司諫猶忙在此趣淵明却少知

初冬

已罷彈冠欲挂冠一卷天遺養衰殘雨荒園菊枝枝瘦霜  
染江楓葉葉丹羹釜帶鱗烹白小蓬門和蔓繫黃圓夕陽  
更動閒遊興十月吳中未苦寒

泛舟

去去浮輕舸飄然興自豪葉凋山寺出溪瘦石橋高草徑



牛羊下烟邨鶴鵲號還家一盃酒未畏暮風饕

忽得京書有感

白髮蒼顏七十翁朽株枯木畧相同如山儲藥難醫拙  
斗堆金不換窮昨夢已拋空劫外殘年盡付醉眠中故人  
苦未知心事一紙空煩寄斷鴻

夜雨

澤國寒多雨畸人夜少眠不緣醒作病只合醉終年庭艸  
已爭茁園梅空自憐重雲不難挾無劒倚青天  
寒雨連三夕幽居只數椽家貧輕過節身老怯增年月  
悲歌裏關山淚眼邊梅花自開落歎息爲誰妍

冬晴閒步東邨由故塘還舍作

紅藤拄杖獨相羊路遶東邨小嶺傍水落枯萍黏蟹椹人鄉

植竹以取蟹謂之蟹椹

雲開寒日上魚梁洛陽二頃言良是光範三

書計本狂歷盡危機識天意要令閒健返耕桑

### 明日復雨排悶

湖上孤邨冷欲冰更看衰與病相乘夢回點滴簾間雨心折青熒帳外燈雖有數椽常是客僅存一肉未成僧披衣偶取南華讀打破愁城喜不勝

### 寓歎

人生各自有窮通世事寧論拙與工累馬革心空許國不龜手藥却成功早朝玉勒千門雪夜坐篷牕萬壑風借得奇書且勤讀小兒能續地爐紅

子坦以新昌木炭二百斤來

春日

節節足足雀噪檐朱朱白白花窺簾坐傍設酒隨時飲牀  
上堆書信手拈寓世無求猶役役杜門不病亦厭厭春濃  
日永有佳處睡味著人如蜜甜

邨夜

寂寂山邨夜悠悠醉倚門月昏天有暈風軟水無痕迹爲  
遭讒遠身由不仕尊敢嗟車馬絕同社自雞豚

秋晚閒步隣曲以予近嘗卧病皆欣然迎勞

放翁病起出門行績女窺籬收豎迎酒似粥釀知社到甍  
如盤大喜秋成歸來早覺人情好對此彌將世事輕紅樹  
青山只如昨長安拜免幾公卿

雨夜

歲晚茆茨劣自容，齒搖將脫髮將童。  
心遊萬里關河外，身卧一牕風雨中。  
醫不可招惟忍病，書猶能讀足忘窮。  
夜闌睡覺蛩聲裏，時見燈花落碎紅。

閒居對食書媿

遊宦無功坐免歸，誰令盤筋極甘肥。  
錦鱗差尾魚登俎，繡羽駢頭雉觸機。  
桑落蒲壺春盎盎，雨前轉磴雪飛飛。  
殘年何地酬君賜，自古羈臣厭蕨薇。

老病家居幸歲穰，味兼南北餽枯腸。  
蒲脾蜜熟餵隄美，下棧羊肥傳餽香。  
鱖刺河魴初出水，迷離穴兔正迎霜。  
山僧一鉢無餘念，應笑先生爲口忙。

秋夜獨酌

壯志隨年減，羈愁與夜長。  
月高寒暈淡，花坼露叢香。  
仕畏譏銷骨，歸判酒腐腸。  
青燈寫孤影，相勸盡餘觴。

雨中排悶

潤入盆山綠葉稠，倦攤書帙小牕幽。  
浮雲不卷時時雨，薄酒無功日日愁。  
積潦漲來妨躡屐，好山遮盡罷登樓。  
青秧搖蕩湖堤決，一飽前知未易謀。

書室

客來莫笑席塵凝，靜處工夫却少增。  
黑蟻常緝簪壁簡，瘦蛟時落越溪藤。  
尚能豪健如霜鵲，未遽衰殘學凍蠅。  
更喜論文有兒子，夜牕相對短檠燈。

放歌行

君不見汾陽富貴近古無二十四考書中書又不見慈明  
起自布衣中九十五日至三公人生窮達各有命拂衣徑  
去猶差勝介推焚死終不悔梁鴻寄食吾何病安用隨牒  
東復西獻諛耐辱希階梯初無公論判涇渭徒使新貴矜  
雲泥稽山一老貧無食衣破履穿面黧黑誰知快意舉世  
無南山之南北山北

病起山居日有幽事戲作

鶴骨龜腸欲不禁扶衰初喜罷呻吟盆山冰釋書牕暖藥  
灶香濃道院深筆健乍臨新獲帖手生重理舊傳琴閉門  
局促還堪恨雲海何時豁此心

冬夜讀書有感

一指頭禪用不窮  
一刀七藥去凌空  
汗牛充棟成何事  
堪笑迂儒錯用功

新闢小園

新展山園半畝強  
笑人車馬出籠坊  
山禽乍暝慙慙語  
野蕩無風自在香  
點點水紋迎細雨  
疎疎籬影界斜陽  
出門遙向隣翁說  
釋耒相從共一觴

祠祿縻人未染官  
春溪幽國有餘歡  
筍生遮道妨行藥  
果熟團枝礙整冠  
煮酒拆泥初灑灑  
生綃裁扇又團團  
退飛風際由來事  
莫羨青霄刷羽翰

園中小飲

此老心中萬頃寬  
小園幽景日追歡  
寧教酒欠尋常債  
聊就人求本分官  
高柳陰濃烟欲暝  
叢花紅溼露初溥  
時月桂方  
盛開要知澤國年  
光晚已過清明尚淺寒

西牕

西牕偏受夕陽明  
好事能來慰此情  
看畫客無寒具手  
論書僧有折釵評  
薑宜山茗畱間啜  
鼓下湖尊喜共烹  
酒餽朱門非我事  
諸君小住聽松聲

初夏

已作梅黃雨猶餘  
麥秀寒穿林紅練  
帶拔地碧琅玕酒  
向愁邊薄衣從病  
後寬所欣消渴減  
乳酪正甘酸

遣興



金甫詩選 卷一  
壯歲元多病長年敢自期賤貧交易絕憂患夢常悲續食  
叨微祿寬心賴小兒平生鏡湖上天乞小茆茨

四月晦日小雨

霏霏亂點暗朝光蔽蔽奇聲渡野塘一浦未輪新漲綠四  
郊聊壓旱塵黃風生團扇清無暑衣覆熏籠潤有香竹屋  
茆簷得奇趣不須殿閣詠微涼

散步東郊

偶從北隄繚東崗曳杖行歌踏夕陽一徑入雲多鹿跡數  
家臨水共漁梁墊風蕭瑟知秋早社酒淋漓喜歲穰鄰曲  
不須憐老憊尚能尋句舍年光

早秋

涼颺淅淅撼庭柯微雨蕭蕭集浦荷  
艸閣檐虛覺山近蓬牕地迤得香多  
謀身白拙窮無鬼閉戶長閒睡有魔  
臺省諸公盛冠劔固應老子得婆娑

秋入房櫳夜漸長紗厨笛簟怯新涼  
螢光得意穿簾隙桐葉知時拂井牀  
世事本來誰得鹿人生何處不亡羊  
燈前笑向吾兒說又過銅匱半篆香

步至湖上寓小舟還舍

山居苦無事攜稚出門行酒賤逢人醉  
農閒到處耕巷牛聽晚笛池鷺唳枯萍  
東望生秋興樓臺壓綠城

細浪隨搖櫂新涼入岸巾  
斷行初到雁空擔  
算歸人漫道貧非病誰知  
嬾是真疎鐘起詩思迢遞度烟津

八月三日驟涼有感

殘暑侵人畏汗霑，清秋乍見月纖纖。  
自燒熟火添香獸，旋把寒泉注硯蟾。  
佳客誤占螢入戶，遠書空喜鵲鳴簷。  
悠然獨對青燈卧，誰念柴門老病兼。

俗以螢飛入室爲有客至之兆

南堂與兒輩夜坐

殘暑初歸肺病蘇，胡牀清夜集前除。  
風高木葉危將脫，月上天河淡欲無。  
鵲影繞枝樓未穩，荷盤擎露重相扶。  
淒然又起流年感，兩鬢如蓬日夜枯。

題齋壁

閉門無事不勝閒，心境超然一室寬。  
香岫火深生細靄，硯池風過起微瀾。  
睡餘但欲依書几，坐久還思弄釣竿。  
擾擾

平生成底事鏡湖歸隱老黃冠

手斲雲根結艸廬平生心事滿無餘二升菰米晨炊飯一  
椀松燈夜讀書天理直須閒處看人謀常向巧中疎烟波  
有趣君知否裂網伸鉤也得魚

閒中

閒中高趣傲羲皇身卧維摩示病牀活眼硯凹宜墨色長  
毫甌小聚茶香門無客至惟風月案有書存但老莊問我  
東歸今幾日坐看庭樹六番黃

書室明煖終日婆娑其間倦則扶杖至小園戲作長  
句

美睡宜人勝按摩江南十月氣猶和重簾不捲畱香久古

硯微凹聚墨多月上每看梅影出風高時送鴈聲過一杯  
太淡君休笑牛背吾方扣角歌

初冬

老客人間百事慵樂哉閉戶過今冬朝爐獸炭騰紅焰夜  
榻蠻氊擁紫茸蝟刺圻蓬新栗熟鵝雛弄色凍醅濃題詩  
正自消閒日本不爭先萬戶封

冬夜戲書

東歸剡曲寄彷徨閒日雖冬亦自長梅瘦有情橫淡月雲  
輕無力護清霜長魚通印鹽花白珍鮓披緜麴糝香一飽  
喟然還自憫彊顏垂老食官倉

寄題哲上人漫堂

老子從來任運行愛君堂以漫爲名北邙大有英雄骨柱  
用工夫過一生

夜坐

葉盡木無聲天高夜自明映牕燈半滅掠野雁孤征葉裂  
人間事雲浮身後名惟應托長鑱寂寞送浮生

效蜀人煎茶戲作長句

午枕初回夢蝶牀紅絲小磴破旗槍正須山石龍頭鼎一  
試風爐蟹眼湯巖電已能開倦眼春雷不許殷枯腸飯囊  
酒瓮紛紛是誰賞蒙山紫筍香

閒中富貴

要信人生各有緣閒中富貴亦關天綠牕靜對千梢竹翠

賢新疏一脈泉愛百衲琴常鎖匣買雙鉤帖不論錢箇中  
得意君知否不換金貂與玉蟬

得季長書追懷南鄭幕府慨然有作

從戎昔在山南日彊半春光醉裏銷綠樹啼鶯窺帽影畫  
橋飛絮逐鞭梢花經小雨開差晚笙怯餘寒澀未調惆悵  
流年又如許羈魂欲仗楚詞招

正月十一日夜夢與亡友譚德稱相遇於成都小東  
門外旣覺慨然有作

當年與子別江干漸老心知後會難豈料今宵清夢裏東  
門交轡說春寒

觀碁

一枰翻覆戰枯碁慶弔相尋喜復悲失馬翁言良可信牧  
豬奴戲未妨爲白蛇斷處真成快黑幟空時又一奇歛付  
兩奩來對酒泠泠聽我誦新詩